

東  
華  
續  
錄

臣朱壽朋敬編

臣沈彭年恭校

九月己卯諭景壽現在因病未痊賞假一月調理所管鑾儀衛事務著伯彥訥謨帖管理正黃旗滿洲都統著恩承署理○刑部奏光緒九年八月二十日內閣奉 上諭光祿寺少卿延茂奏敬抒管見一摺各省閭閻刑衙門承審案件自應虛衷研鞫以持情法之平何得草率定擬致有失入情事若明知案情未確或迴護原審或規避處分以致冤及無辜尤屬不成事體嗣後著各該督撫督同臬司於人命重案悉心推勘以期無枉無縱其所請現辦各案如有失入情節准其奏明更正寬免處分之處著刑部議奏等因欽此 臣等遵即檢閱該少卿原奏內稱近日各省所謂能幹之吏率多武健嚴酷之才視民命如草芥如四川東鄉之奇冤江南三牌樓之失入河南王樹汶之呼冤可為往鑒雖經 朝廷或特派使臣或提交刑部持平反而死者不可復生斷者不可復續況此外之無可控訴未經糾參抱痛沈冤於九泉者正不知其凡幾也干天和而召災祲未必不由於此奴才愚以為與其平反於失入之後何若矜慎於聽訟之時應請 旨飭交各疆吏督同臬司於現辦案件有關民命者悉心推勘如有失入情節勿稍迴護

准其奏明更正仍 加恩寬其處分如不肯平反始終固執經旁人參奏得實卽治以欺罔之罪等因查  
臣部核覆各省命盜案件每年不下數千起 等均逐件評閱遇有關係民命如案情稍涉可疑者卽隨  
時駁令覆審各該省果能虛衷研鞠將駁審之案無論失出入訊得實情據實平反檢舉更正處分自  
可邀免無如近日不肯州縣玩視民命多係草率從事該管上司不肯認真詳細推勘非巧為彌縫卽多  
方掩飾其能平反更正者百無一二而固執原擬者則比比皆是推原其故總由各該督撫御庇屬員迴  
護原審其尤甚者明知案情實有冤抑卽據實更正處分亦輕以爲與全省局面有礙終不肯自認錯誤  
積習相沿牢不可破卽如河南鎮平縣王樹汶呼冤一案始而迭經御史參奏該省仍敢飾詞覆奏入人  
死罪繼而奉 特旨提交 臣部審辦該前撫李鶴年猶復強詞曉曉置辯希圖搖惑衆聽顛倒是非在已  
經發覺者平反尙如此其難其餘未經發覺者更必任意消彌安望其自行更正耶該少卿所奏案有  
失入情節惟其更正寬免處分係爲矜卹民命力挽積弊起見第此等情節亦有區別有下司自知審辦  
錯誤稟請更正則承審官處分自可邀免如係上司查出更正則原審官豈能免議倘在其奏以後更應  
請 旨遵辦此時礙難預定相應請 旨飭下各省督撫嚴飭所屬嗣後審理命盜等案務須詳細推鞠  
果係情真罪當毫無疑義者詳敘供招解勘該臬司亦應親提覆審如情罪不符或實有冤抑者卽立予

平反不得稍涉週護總期無枉無縱俾成信讞倘有規避處分致有冤及無辜等情亦卽嚴行參辦如能據實更正應由臣部臨時移咨吏部酌核辦理又查該少卿延茂原奏內稱近來京控命案居多發交各省者連年累月多不奏結論者或謂近日京控率多砌詞拖累奴才竊以爲砌詞京控誠所不免而竊竊編氓含冤負屈正自不少果如砌詞舛聽察審最易奏結更不應避其遲延最久者非賂遺積淹卽係瞻徇週護以致沉冤莫白竟有監候待質二十餘年者應請飭交軍機大臣將近年京控案件未經結奏者共若干起開單呈覽嚴旨交催勒限奏結並請嗣後凡有京控案件飭交刑部分省立檔嚴定期如逾限不結者由刑部專摺奏參如刑部不肯奏參一經官糾彈以徇庇論等因臣等查各省京控之案從前係由都察院會同步軍統領衙門每年兩次將咨交未結各案彙開清單奏催近來僅據步軍統領衙門每兩月將京控咨交數目具奏知照臣部轉行各該省遵照其都察院京控之案並不知照臣部卽無從稽核惟查各省辦理京控案件近年有將已未完結數目及未能審結緣由每年分兩次彙奏者亦有並不具奏者殊不盡一現當稽核京控審限之際相應請旨飭下各省督撫將軍都統府尹查明京控交審案件無論奏咨每年將已未完結數目分兩次彙開清單具奏以歸畫一並摘錄案由註明交審月日及將未結各案因何未能審結緣由於每年兩報奏時詳細聲明分咨臣部至都察院及步軍

統領衙門每年接收京控之案無論奏咨交審均一律開單咨部以憑稽核俾免稽壓而清庶獄得  
如所議行○岑毓英奏等據雲南閩省紳士翰林院庶吉士羅瑞圖甘肅補用知府倪濟江西試用知  
府宋廷樞等公稟雲南通志創始於康熙三十年增修於雍正七年均經前督撫先後奉表恭呈御  
覽迨道光六年續修稿成尚未呈進十五年將稿刊刷至今五十餘年天時人事迭有變遷事與以來其  
間忠臣義士亟待表揚以及風土人物賦役秩官學校武備建置選舉群異藝文諸大端在在均宜增訂  
即今不修恐以後更難稽考紳等公同商議擬請奏明設局委員續修以昭法戒又據各紳公稟滇省警  
後事宜如振興學校布置邊防開墾荒田豁免夫馬裁併縣卡收養窮民諸事皆賴次第施行惟守節婦  
女多窮而無告飢寒交迫深堪憫惻聞貴州廣西各省均設有敬節局敬節室收養節婦每月各給銀一  
兩上下守節撫孤者酌加銀數錢所以維持風化法至良也擬請奏懇 皇恩仿照各省設立敬節室俾  
各節婦得免失所於風化更有裨益等情具稟前來臣等伏查通志為徵文考獻之書必須隨時修輯今  
閱時既久法度多有損益卽如減免錢糧裁革夫馬加廣申額添設學校皆出自 逾格恩施尤宜數列  
志書以垂萬世茲據該紳等稟請設局續修臣等擬卽委候補道陳廷珍協同該紳等設局採訪事實陸  
續修輯先草創初稿另延宿學酌酌妥洽於稿成之日由司道會擬具詳 等語查無異再奉表恭進以

昭慎重所儲經費山官紳竭力勸捐節支用不動正款亦不累民至守節婦女茹荼飲冰情殊可憫應如該紳等所請仿照各省設立敬節堂酌給發贍以廣 皇仁等語當即飭該紳士清查冊報每月約需銀三百兩已飭同司遵自本年四月起先借墊試辦俟由地方籌付有著之款再妥議章程奏請立案以期行諸久遠報聞○庚辰伊犁參贊大臣升泰與俄國分界大臣佛里德在塔城會議定塔爾巴哈臺界約七條成○辛巳諭穆隆阿現在病未痊愈著賞假一個月調理所管鑲藍旗蒙古都統著奕綱署理○癸未諭御史章勣廷奏請嚴別漢教習頂替積弊等語教習有課士之責豈容微倖濫充嗣後凡遇傳補之時著禮部飭令該員填寫親供核對筆跡如有前後歧異即著扣除究辦○諭崇綺等奏查勘 昭陵城牆等應修各工請擇吉興修一摺著欽天監於本年九月內選擇吉期先行知照即著盛京將軍會同工部侍郎屆期敬謹興修○以夏毓秀為四川松潘鎮總兵○李鴻章奏 欽差光緒八年十二月初四日 寄諭兵部奏請飭裁各省防勇確核兵額以節餉需一摺著各就該省情形悉心酌度奏明辦理等因欽此當與前署督臣張樹聲會商悉心酌度並咨行提鎮司局一體妥細籌議旋據陸續查覆由藩司核駁等核議具詳前來臣查北洋海防所有水陸各營事關重大現尙不敷分布毋庸置議外直隸從前勇營迭經奏明撤遣所存者本止直字等數營前因兵力單薄飭調直字兩營移紮大沽口戰勝一營移

欽北塘煙頭沽賣令修築壘壁協同扼守今年酌裁臬司親軍隊百人津防雲字馬隊二百人騰出月餉撥給他項要用已先分別奏咨現僅存樂字等營勇一千數百人與練軍分駐要隘彈壓地面緝捕烏盜實已無可議裁至通省綠營制兵如秦甯馬蘭兩鎮皆有守護陵寢專責向不抽練此外各標久已抽練成軍今因大名宣化兩鎮各有勇隊一營已飭改歸兵額作為練軍即於該兩鎮制兵內裁去老弱五百人核扣底餉照章添放練餉亦經咨部查照在案直隸畿輔重地幅輳遼闊盜匪出沒靡常東西切近海濱西北控制邊外專賴練軍防勇往來巡緝乃可建威消萌其綠營皆有公汛除抽練外餘已無多當內外各城各省之通衢差煩事劇又須守護各州縣倉庾監獄未可過於裁汰轉致汛地全空臣惟有督飭將吏隨時加意整頓概不准老弱充數總則有一兵得一兵之用下部知之○乙酉諭御史謝謙亨奏京官私行回籍請旨嚴禁等語在京各衙門所屬官員均有職守若如所奏內閣部院等官往往未經告假私行回籍殊屬不成事體著各衙門堂官隨時稽察如有此等情弊即行從嚴參辦倘徇隱不舉別經發覺並將該堂官一體議處以肅官常○以徐延旭為廣西巡撫張夢元為廣西布政使○廣東巡撫裕寬以病免○以倪文蔚為廣東巡撫○丙戌左宗棠奏江南財賦甲於天下而兩淮課鹽為財賦所入之一大宗運鹽足額則收課日增課增則餉裕固一定不易之理臣蒞任後因新商盼望增引甚切部文

迭催加引恭展先後奏請楚皖鹽淮北加增額引本爲裕國計順商情起見初不料行楚租川之見求融交章梗議上頒宸聽欽奉聖訓指示機宜飭令加費減引已懷遵諭有將楚票十五萬引減爲三萬引皖票四萬二千餘引減爲一萬七千七百六十引楚則另招新商承辦皖則就原招之商歸併給運於引既無窒礙於新引亦便轉輸商情悅服遐邇交孚本年依棧場鹽到數既旺鄂湘西皖銷數亦較常年有增而南場應築之范堤實屬應辦之水利皆屬工鉅款繁以及邊防緊餉海防軍費河東工需無不於課鹽及新捐票費內騰挪接濟計自前年十二月接篆至今二十一箇月有餘約解過銀寶有五百數十萬兩竊查前歷任自同治三年至光緒初年均不過二百數十萬收至三百萬以上者僅一二年茲光緒八年收數已二百八十九萬餘兩而所收票費一百三十餘萬兩尙不在內此兩鹽已觀微效之實在情形也容俟九年底截清再將出入細數繕呈御覽至淮北受病之源其故有二一在鹽河自西壩至安東縣之傅家嘴六十里河身高仰勢若建瓴一遇水淺則商人起駁之苦拋耗之多費重運遲累日加重一在垣鹽出場票販最重鹽色欲求上色而不可多得遂向他商暗中貼價名曰貼色甚至商夥句串賣放重斤查得情形飭先籌款將鹽河於今春挑浚深通本年霜汛以後鹽艘行運毫無阻滯全綱四十六萬引賴以早日運竣貼色則暗增商本重斤則私佔國課復嚴申禁令並由運司轉飭分



司親赴鹽場履驗遇犯必懲而後數十年之積弊始克掃除現因院豫水患燕齊浸灌淮北之私鹽來源頓減遂謀歸復河南汝甯邊引以廣銷路裁撤食岸折售之鹽以杜侵佔運河以南復飭淮揚鎮就近添募巡勇扼要駐緝凡有益於淮鹽銷路者悉心推求嚴緝私梟不遺餘力而後淮北銷路漸復道光十一二年之舊例從此逐漸推行期必有暢無滯此鹽務起色確有成效可觀者也鹽務素稱利藪商販心志不齊不如其願卽造謠阻撓變幻離奇無所不至近則南北各商均無異說並將視爲世業請運源源仰承 聖謨廣運商民樂利均沾洵堪仰紓 慈恩固微臣始願所不及也報聞○鄭河元奏我 朝深仁厚澤凡籍隸八旗者皆有口糧按期支領矧宗室誼屬 天潢所以體恤而調劑之者更無不優且至此 列聖敬宗收族之 恩亦恐其襲殖不繼致同無賴之行也臣聞宗室例居城內赫赫煌煌鮮不敬而違之既莫觸其忿怒又孰敢欠其錢債乃近來宗室婦人往往囑奢無度家產淨絕糾合匪黨肆行訛案訛案不遂便成鬭毆其呈控於步軍統領者十有九虛迨移咨刑部不得不代傳被告若該婦趕到對質其曲直尚可立判無奈情節本虛又恃貴胄之親延不到案而從中關說之人皆其羽翼輒向被告家中嚇逼錢文非大遂其欲彼此分肥決不和息廿餘年來良民之傾蕩產業者大都以此誠惡風之不可不除者也今夏德蘇氏夥訛張觀準一案經刑部請銷除 黃檔監禁候決行路傳聞無不稱快但糾衆

訛人不止德蘇氏其捏控於步軍統領及五城者亦不止德蘇氏也查婦女呈控例有控告惟宗室婦人  
猶不盡然又查刑部則例凡累傳原告兩月不到者卽行銷案擬請 飭下步軍統領衙門凡宗室婦人  
與訟非有親丁控告概行擲還若既收呈咨部原被告須一齊並傳倘被告先到原告不到其爲無理狡  
賴顯然可見應卽開釋被告速爲銷案以免拖累不必拘定兩月之期若到案情虛則重責其控告並請  
飭下刑部會同宗人府核議請 旨補入則例庶刁風可息良民亦得安矣 上諭給事中鄭溥元奏  
宗室婦人控案非有控告概不收呈咨部後倘原告不到速爲銷案以免拖累請飭核議章程並補入則  
例等語著該衙門議奏○己丑諭御史黃兆樞奏已革河南候補道嚴續前經御史余上華劾積誠先後  
參劾該革員前任戶部司員時遇事請求任勞任怨請飭將該革員在部所辦各事及被參各款一併確  
查戶部員外郎恩泰嗜好多端不知自愛請飭查參各等語著戶部堂官分別查明據實具奏○以曹志  
忠爲福建福甯鎮總兵○諭革任浙江巡撫任道鎔著吏部帶領引見○壬辰賞給廣仁堂米三百石○  
諭軍機大臣等法人脅越議約盡壞該國權利果如所議越南無以圖存大局所關甚重法使脫利古來  
京在總理各國事務衙門並未提及此事意殊叵測劉永福一軍屢獲勝仗當不因彼國議和稍形退沮  
現在進規河內如能尅期攻克以固北圻門戶辦理自易得手前有旨諭倪文蔚等令唐景崧設法激勵

著該撫等密速妥籌徐延旭著懷遵前旨星速出關相機調度所有滇粵防軍岑毓英倪文蔚徐延旭唐  
炯務當督飭將領嚴密布置俾壯聲援勿稍鬆勁糧餉軍火必須力籌接濟朝廷惟恐該兩省餉需不繼  
致失事機諭令戶部籌撥有著之款茲據該部奏轉截撥湖北應解京餉銀十五萬兩解廣西應用四川  
應解京餉銀九萬兩湖南應解京餉銀六萬兩解雲南應用此外另山江西撥銀五萬兩湖北撥銀五萬  
兩解交廣西四川撥銀四萬兩湖南撥銀六萬兩解交雲南等語已諭令各該督撫分別迅速撥解本年  
京餉屢有截留部庫益形支絀茲因邊情緊要特予添撥該督撫等務當深體時艱極力籌辦俾越事及  
早挽回以維大局將此由六百里各密諭知之○癸巳禮部奏內閣鈔出光緒九年八月三十日奉 上  
諭鄧承修奏已故知府不宜濫膺祀典一摺祀祀之典所以報功必實係政績卓著遺愛在民方足以協  
輿情而昭來茲嗣後中外臣工務當詳核事實不得濫請其有奏請建立專祠及附祀者著禮部悉心核  
議分別准駁候旨施行鄧承修所請已故知府馬純武附祀撤銷之處即著禮部議奏欽此欽遵到部除  
恭錄通行外伏查 欽定會典內載各省祀典其第四條曰忠孝節義則忠節諸臣之專祠詳列焉其  
第五條曰名宦鄉賢則名宦之專祠詳列焉計自 國初至嘉慶十八年重修會典時截止凡百七十年  
間 聖武遐宣人文蔚起其致命遂志建德立功諸臣不啻盈千累百而統計專祠不過三十所忠節則

僅正祀二十七人附祀四人名宦則僅正祀五人附祀一人蓋若是其慎重也近自咸豐以來專祠之請悉數難終洵如該給事中所謂幾於無月不見雖云善習從長要非慎重之道茲查署督臣李鴻章所請將已故知府馬純武附祀已故臬司丁壽昌專祠既非忠節之倫自應核以名宦之例恭查乾隆二十年正月奉 上諭直省建立名宦鄉賢祠卽古者尊宗之祀所以崇德尙賢與其祀者必其人實可當之無愧方足以光俎豆而式鄉閭 皇考上諭於崇祀之事加以慎重所以爲世道人心計者具有苦心等因欽此臣部是以於光緒五年奏定崇祀章程必其人身故三十年後方准題請以杜冒濫歷經遵辦在案今已故知府馬純武政事人品既不協於輿評卽無庸計年例合否第論附祀名宦專祠以視崇祀名宦總祠典禮尤爲重大其曷克當之而無愧 臣等公同核議所有已革知府馬純武附祀專祠之案擬請卽行撤銷以昭慎重得 旨如所議行○禮部又奏查會典所列直省功臣專祠係欽奉 列聖特旨勅建足見曠典本非臣下所敢擅請又載雍正十年奉 上諭我朝從前文武大臣持躬正直奉職公忠樹勳建績完名全節者已降旨於京師建立賢良祠永遠展祀以彰令善因思外任大臣鎮撫封疆宣猷布化忠勇効命威愛宜民其政績卓然可紀者身故之後著於本地建立賢良祠俾得永膺祀典既足慰兵民懿好之公亦足爲後來居官者之勸著九卿妥議具奏欽此欽遵議准此後外任文武諸大員著有賢績

博探公論擬實奏請 欽定仰見我 朝崇獎忠節賢勞諸臣 京師暨直省既均有昭忠祠賢良祠府  
州縣又各有名宦祠祀典已極詳備若復徇專祠之請必一人專一祠甚至一人專數祠即使其人無甚  
遺議已未免不符舊制況稍涉冒濫尤於世道人心大有關係臣等公同商酌擬請嗣後專祠曠典應循  
照舊章恭候 特旨加恩與 京師賢良祠一體慎重不准臣下擅請至直省文武大小官員如果身後  
著有賢名遺愛者應均照舊章三品以上大吏准其據實題請入祀直省賢良祠四品以下准其遵照奏  
定年限題請入祀名宦祠陣亡殉難人員原係入祀昭忠祠如不僅以節見身後實著賢稱應照舊章仍  
准其按照品級分別題請入祀直省賢良名宦祠至擬祀名宦各員如果政績燭然現尚未屆題請入祀  
年限應准其造冊咨部送交國史館由館分別應否立傳請 旨定奪庶日後有所徵信蓋竹帛馨香均  
賢勞身後之榮絲毫不可假借而馨香較竹帛爲尤重古來垂芳史冊者甚多而廟食千秋者無幾此亦  
以見祠祀尤當慎重也嗣後必須史館可以立傳之人然後分別應否入祠此外不准躐等擅請再各省  
題請入祠各員冊開事蹟如係軍功則臣部無從查考擬請 頒發平定粵捻方略一部交臣部敬謹收  
藏以憑查考則冊開事蹟之虛實不難立見自可欽遵 諭旨悉心核議分別准駁毋任冒濫 上諭禮  
部奏建立專祠及題請入祀直省賢良名宦各祠應循照舊章辦理並請頒發方略等語各直省建立專

祠係屬順典應候特旨加恩嗣後不得擅行奏請至各直省文武大小官員如果著有賢名遺愛著循照舊章分別題請入祀各直省賢良名宦各祠由該部核議准駁候旨施行以昭慎重並著武英殿頒發欽定剿平粵匪擒匪方略各一部交該部祇領俾資考核餘依議○彭玉麟奏往來治兵江上過江西之九江府德化縣廬山之麓有先賢宋臣周惇頤之墓歷代雖經修理兵燹後已多頽塌前 賜諡忠節巡撫銜羅澤南駐兵九江時又經重修然當軍務孔亟之時未能大為修整上年重巡閱長江至江西湖口與鎮臣提督銜丁毅方曾及集賢鳩工督修堅固堂皇頗稱大觀塚墓氣象壘石為壙焚磚為垣立碑碑坊改建守塚廬會培植松柏今年夏工竣六月初四日重過九江率丁毅方並九江鎮道以下公同致祭惟聞該先賢裔孫住湖南道州本籍及九江德化縣墓旁皆為奉祀生今墓所後裔並無奉祀生實為缺典又每年春秋祭祀地方正印官並不躬親致祭苟且草率虛應故事以致牆垣頽壞墓道荒蕪殊不稱 朝廷尊儒重道之意且無以興士民高山景行之思理應請 旨飭下江西巡撫查明向有奉祀生與否如無奉祀生應請 飭部查照先賢祠墓之例給與守墓奉祀生一名以昭我 國家崇祀先賢之盛典得 旨著禮部查明辦理○甲午諭前據雲南糧儲道前詹事府右贊善劉海藻奏參前吉林將軍銘安貪濫恣橫聲名惡劣及啟秀查辦代為彌縫各節當諭令崇綺確查具奏茲據奏稱遵旨查明據實

撥陳並民人郭繼光控告王紹元一案請交吉林將軍核辦各摺片此案已革知府劉光煜前在吉林奉  
派查辦燒鍋酒稅及錢當等行盤捐輒收受商人饋送謝儀錢文合銀七千兩之多情節嚴重著照所擬  
杖一百流三千里照例依限追繳完贖後發往軍臺効力贖罪通判劉維楨州同朱文卿府經歷王謙各  
因事收受饋送謝儀著一併革職知縣李宴卿於劉光煜等辦理稅盤輒代各商請託迭次承辦謝儀實  
屬有玷官箴著卽行革職縣丞趙維藩卽趙建邦因事請託收受謝儀著卽行革職並著直隸總督飭屬  
嚴拿解交吉林將軍訊辦銘安於劉光煜等實犯賊私失於覺察著交部議處啟秀被參各情既據宗綺  
查明均無其事卽著毋庸置議○丙申欽給迴州粥廠米石○丁酉諭軍機大臣等岑毓英唐炯奏密籌  
越南邊防倪文蔚奏探報邊情防務愈棘各一摺法人荷越議約果如所議越已無以立國大局所關甚  
重獨以劉永福一軍屢次獲勝進規河內如能克期攻拔辦理得手則越事尙可挽回乃滇軍遽行退紮  
以致劉團解體有回駐保勝之議彼族將益思狡逞邊事尙可問耶岑毓英唐炯調度乖方貽誤大局著  
傳旨嚴行申飭卽著懷遵前旨督飭防軍扼要進紮嚴密布置倘仍怠緩從事定將該督撫治罪唐炯著  
星速出省馳赴防所徐延旭諒已出關法人現由丹鳳攻撲山西黑旗各營恐難抵禦岑毓英倪文蔚徐  
延旭唐炯務當飭令各軍嚴中警備聯絡聲勢相機援應不得稍涉疏虞將此由六百里各密諭知之○

己亥諭是日引見之革任浙江巡撫任道鎔著以道員選用○諭李鴻章奏遵查職官自戕一案分別參辦一摺此案山海關左翼協領音登安因事將佐領福祿混記過並傳見申飭致福祿因被陵逼赴音登安宅自戕殞命實屬罪有應得音登安著即行革職以示懲儆委署驍騎校馬甲成興成安倚勢招搖於兵役需索關稅從中分肥均著革去委署驍騎校並革去馬甲副都統職德辦理案件過當並任聽音登安朦混將福祿記過失察親隨家人招搖亦有應得之咎著交部議處○甲辰諭左宗棠奏承審重案平反得實各員請旨獎勵一摺江甯布政使梁肇煌江南監巡道德壽於三牌樓命案審出確情嗣經臬司等審訊悉照原議定擬該司道等虛衷研求盡力推勘自應給予鼓勵梁肇煌著交部從優議敘德壽著送部引見江蘇候補道吳邦祺首先獲犯訊供江甯府知府趙佑宸隨同督審均屬著有微勞著交部議敘○丙午諭陳士杰奏官紳籌賑出力等語本年山東利津等處猝遭水患災區甚廣饑民待賑孔殷經順天府府尹周家楣代籌賑銀三千兩並各官紳先後由上海籌解銀三萬六千兩棉衣一萬件東省災黎藉資接濟周家楣不分畛域廣為勸募得以集成巨款直隸候補道盛宣懷浙江候補道徐潤翰林院庶吉士沈晉登候選道鄭官應補用道李培松候選主事經元晉國子監學正謝家福河南候補縣丞楊廷果設法勸捐不遺餘力揀選知縣潘民表候選訓導嚴作霖舉人施則敬分赴利津齊東齊河等處



核實散放均屬心存利濟見義勇爲著俾旨嘉獎以昭激勸○丁未諭劉錦棠等奏請將籌解西餉足數之布政使懇恩獎敘一摺西征餉需關係緊要所有竭力解濟之員自應量加獎敘江甯布政使梁肇煌歷年籌解均足十成著賞加頭品頂戴以示鼓勵○諭陳士杰奏籌辦冬賑請截留本年新漕一摺山東恩城等處黃水爲災迭經諭令該撫寬籌賑款並截留京餉及江北漕米以資賑濟茲據奏稱災區較廣自冬徂春爲日甚長小民無計謀生深堪憫惻加恩著照所請准其截留本年新漕五萬石並隨漕輕賸等項銀兩俾作賑需陳士杰務當督飭各該地方及委員等核實散放毋任吏胥稍有侵蝕用副朝廷軫念災黎至意○尙賢奏崇文門正副監督向係司員按年輪充嗣以積弊甚深仰蒙 列聖洞鑒改揀文武大員派充正副監督由戶部內務府具題按年更換歷經遵辦在案良以統屬既專司員自不敢舞弊立法本極周詳奉行可期久遠無如人心日下奢慾難盈未有如今日崇文門委員訛稅之甚者也天法積久則多弊困已極則思通謹就奴才聞見所及爲我 皇太后 皇上瀝陳之一禁正家丁驗收也向來監督接管之後於奏派委員外復派親信家丁與委員一同驗貨收稅名爲前堂是於調劑家人之中仍寓稽察委員之意應事固可爲至周流弊亦因而愈甚推原其故家人與委員均監督親信之人最易串通本意寄爲腹心轉致通同作弊即使監督精白乃心已有防不勝防之處卽如正監督家人任福聞

其訛案馱夫吳大等六人釐稅刑求不遂株連利興果行等五家勒令封閉並將該店馱夫數十名交東城吏目看押過勒罰銀一千五百兩尙在羈押又罰洋紙鈔銀三千兩未經繳納尤可駭者大瀨駟被勒罰銀四百金平民可知凡此皆家人任福與委員煖揚阿夥同主張以外尙有因訛案不遂拉禁者若干案歷年市經兩月騷擾已如此難堪種種情形均係奴才在直房聞之於副監督克蒙額倘今召見克蒙額自不難一一指實在克蒙額具有大良萬不敢掩存欺飾致誤聖聽夫監督有統轄之責豈容事權下移聽委員家人播弄實屬不成事體應請飭部嚴定章程凡家人驗稅監收無論中外關權應請一概禁止均派委員辦理如有濫徵濫罰分肥私案情事一經告發重議以贓私處分庶足以除積弊而破錮習一嚴定監督處分也向例正副監督於奉旨接充後各保委員一名當委則自酌派在清潔自好之員奉公守法固不乏人而營利之徒一經派入假公濟私或於正額之外恣意濫徵或藉罰稅之名多方訛案近聞商賈畏難不前關稅日見減色紛紛傳播不爲無因卽如現在奏委煖揚阿劣跡多端凡於訛案情事皆與該家人任福表裏爲奸該監督皆不得過問貽害商民莫此爲甚方今水漲頻仍民氣蕭索全仗百貨流通小民藉以謀生冀消隱患若容如此劣員任意訛案實於國計民生大有關係奴才愚昧之見除煖揚阿一員應請派員查辦撤委外此後如過此等劣員該監督不卽行撤委別經參揭卽

應與濫保匪人同科更不得因保奏在先迴護委員致干罪戾一甲定罰稅章程也向例一遇偷漏罰款皆有限制近來逐漸加增比正稅過於百倍名為充實辦公實則均入私橐在無知商民偶有偷越一經發覺照例示罰亦足以重正課而懲奸徒乃目下情形日甚一日或經蘆溝橋分局抽收而猶多方訛索果行封閉已有五家或由齊化關報稅赴務而猶自言留難被押者不止一起以致肩挑貿易各屬車輛無不搜索威嚇名為報效又名為行李稅海巡四出滋擾恆至一二百里之外以致道路側目查例載京外各直省衙門均有各道御史稽察相維其法良美崇文門為國課大矣山海橋航埠商輳集易滋弊端可否飭下戶部詳議酌添御史稽查庶免一切濫徵訛索之弊至議定罰款亦須通行京外俾令官民咸遵不得任意弛縱庶於懲剔弊竇之中仍有慎重關稅之意上諭光祿寺卿尙賢奏崇文門正監督所派驗貨之委員煖揚回家丁任福通同作弊訛索夫吳大等六人釐稅刑求不遂株連利興果行等五家勒令封閉並將該店歇夫數十名交東城吏目看押勒罰銀一千五百兩又罰洋紙鋪銀三千兩未經繳納額駙符珍亦被勒索銀四百兩此外尚有因訛索不遂押禁者若干案種種情形均聞之於副監督克勤額等語著克勤額明白回奏並著派寶鑒閣敬銘確切查明據實具奏所請詳定章程之處著一併議奏○熱河都統恩福卒賜卹如例並准入城治喪○諭巡視中城給事中安祥等奏整頓捕務及

請飭匯緝捕經費各摺片著直隸總督按照戶部前奏所撥銀兩趕緊解京以資應用○以錫珍爲倉場侍郎景廉爲吏部左侍郎○以繼格爲熱河都統○諭軍機大臣等法人既與越南立約必將以驅逐劉團爲名專力於北圻滇粵門戶豈可任令侵逼現今總理各國事務衙門照會法使告以越南久列藩封歷經中國用兵剿匪力爲保護爲天下各國所共知今乃侵陵無已豈能受此蔑視倘竟侵及我軍駐紮之地惟有開仗不能坐視等語此後法人仍欲逞兵於北圻則我之用兵固屬名正言順劉團素稱奮勇現在退紮山西距河內稍遠著徐延旭飭令劉永福整軍進紮相機規復河內省城不可稍有退阻北甯爲我軍駐紮之所如果法人前來攻逼即著督飭官軍極力捍禦毋稍鬆勁岑毓英等前奏滇軍駐紮山西輪船礮彈可及城中防守不易惟該城與北甯相距較近必應固守以成犄角之勢滇省防營無多難資策應著岑毓英唐炯添募數營以厚兵力○是月俄羅斯國新簡駐華使臣博白傳抵任

冬十月己酉諭前據御史黃兆鵬奏請飭查已革道員啟續戶部所辦各事及被參各款當諭令戶部堂官查奏嗣據給事中鄧承修奏參黃兆鵬摺罔上徇私請旨嚴懲等語茲據麟書等奏稱啟續在部所辦各事前經寶鋆等查辦有錯誤遲延之處該員旋即升道員此後並未承辦部務其爲人心思伶俐語言便捷當年在部並非精實正大之才自其被參亦不聞有惜此人材者革員啟續既據查明被參並無屈

抑著毋庸置議至御史爲廢員乞恩跡近徇私此風斷不可長黃兆棟著交部議處○諭御史劉恩溥奏崇文門監督瑞聯之家人出姓擅坐前堂提賣漏稅小販福建道員解焜之眷屬來京指爲包攬稅務勒罰銀二千兩並請飭該監督等嗣後按日分往該衙門嚴切稽查等語著寶鋆閱敬銘歸入尙賢所奏一併確切查明妥議具奏○庚戌禮部左侍郎張濟卿卒賜卹如例○諭克勤額奏遵旨明白回奏一摺據該委員煖揚阿辦理稅務勒罰各款實係曾向尙賢言及等語著寶鋆閱敬銘歸入尙賢前摺查明具奏○辛亥諭禮部左侍郎著徐卹調補未到任以前著陳蘭彬署理劉錦棠著補授兵部右侍郎未到任以前著徐用儀署理○以延煦爲鑲藍旗蒙古都統○壬子以河工出力予開歸陳許道陳赫等獎敘有差○鑲藍旗蒙古都統穆隆阿以病免○癸丑以李用清爲貴州布政使○以邊寶泉爲陝西巡撫劉瑞芬爲江西布政使王嵩齡爲江西按察使○諭前據左宗棠奏請以補用道王嘉敏署理淮揚海道經吏部核與例章不符奏駁茲據該督等奏稱該處地方河工均關緊要人地實在相需仍請以該員署理江蘇淮揚河道員缺著加恩王嘉敏署理嗣後不得援以爲例○諭前據御史劉恩溥奏參陝西巡撫馮舉駿聲名平常等情當降旨派額勒和布張佩綸前往查辦茲據奏稱當照原參各款詳細查明馮舉駿不能屏絕餽送不知約束家丁尙無賄賂公行確證同知張兆銘知縣汪鳳漢朱兆鴻皆爲馮舉駿所信昵與

該撫戚龍何姓門丁劉姓均有招搖聲氣知縣羅驥庇縱匪首賂洪剛及通判王炳煌在署任內焚索各節該撫並不參奏該省嚴卡過密委員中飽辦理營田始勤終怠作輟因循署糧道常英查無案前拜門虧短倉儲情事惟與該撫之子馮蘭堂往來致送撫署禮物並於餘米折徵一項貪多務得等語馮驥驥於吏治微徭釐捐累荒諸要政任用匪人粉飾靡弛以至屬吏家丁因緣為奸弊端雜出實屬有負委任馮驥驥著開缺交部嚴加議處候補同知張兆蓉恃才粗獷苛虐病民臨潼縣知縣汪鳳樓奔競工賄好尤重渭南縣知縣朱兆鴻以內營務處為由移寓撫署與充當幕友進署辦事者無異亦均有招搖情弊前南鄭縣知縣羅驥候補同判王炳煌著即行革職前鳳陽縣知縣雲田局提調王贊襄年老多病著勒令休致鹽法道常英貪婪卑鄙有玷官箴著開缺交部議處○諭額勒和布張佩綸奏訪聞沈應奎等劣跡請旨懲處等語現任貴州布政使沈應奎前在陝西按察使任內專事逢迎浮侈驕婪於奉委巡邊時需索供應擾累地方實屬任意妄為貪鄙不職沈應奎著即行革職前臨潼縣知縣沈家楨歷任繁劇貪穢營私已故知府張國鈞與沈應奎換帖結納纖鄙賈肆升鳴爾同知王恩海陝西候補知縣史悠順諂媚招搖聲名狼籍著一併革職以儆官邪○諭吏部奏遵議處分一摺福建道監察御史黃兆璽著照部議降三級調用○額勒和布張佩綸奏臣等出京時因陝西醴泉相沅杰故殺鐵匠張姓一案始經部

駁旋經京控物議繁滋囑司官等密錄案由備查未至陝境聞相沅杰已於京控後殞斃而陝省傳言且謂臣等此來實治醴泉之獄者隨劄署臬司張端卿將全案卷宗密送前來詳細檢閱耗謬支離出人意表不得不據實糾參以副 聖朝欽恤庶獄之至意緣此案相沅杰籍隸醴泉所居東莊村距縣六十里村北廢窖一口爲相沅杰業地窖去古廟二十三步去相沅杰馬房半里許河南鐵匠陸西合及夥張貴在古廟居住光緒五年九月二十左右相沅杰窖內見有屍身十一月十四日該縣陳西庚到村驗屍驗得屍身上半用草掩蓋頸項纏繩兩手用皮條向前綁縛口塞藍布左肩甲兩脚面左臀均有木器傷一處係生前受傷被勒身死旋據陳西庚於六年二月初九日詳稱十一月二十八日獲犯陸西合據供光緒五年九月初十日往東莊村古廟因與張貴口角乘其睡熟用皮條扣住兩手用小木板毆傷及左肩甲兩脚面左臀張貴辱罵並言定將陸西合殺害陸西合起意致死用布塞口用繩拉勒張貴身死移屍窖內用草掩蓋天明推車他去嗣經該縣訪聞窖主具報驗屍獲犯將陸西合依律擬斬監候招解到司臬司沈應奎以有無同謀加功之人及是謀是故屢次駁審復提府研鞫兩次始據陸西合供出相沅杰並究出其傭人魏時運董招玉等經府定供具詳旋據撫臣馮譽礪於光緒七年九月十六日題稱光緒五年六月間張貴同陸西合來至該縣寓居村廟八月間相沅杰因斥說張貴製造鐵器不精口角張

賞還而以相沅杰帷薄之私向人談論九月初十日傍晚相沅杰氣忿同魏時運董招玉等到廟時陸西合他出相沅杰取其塼上皮條令魏時運等將張賞兩手向前綑縛拉回馬房魏時運用木棒毆傷其左肩甲相沅杰用木棒毆傷其兩脚面魏時運又毆傷其左臂張賞復以相沅杰翁媳有私之責辱罵並稱事後定行一併殺害相沅杰起意致死隨取繩挽套遞給魏時運等喝令拉勒魏時運等不肯相沅杰聲稱如不拉勒定一併開鎗魏時運等無奈各執繩頭拉勒張賞身死經周維倉趨視勸阻相沅杰喝禁聲張旋與魏時運等移屍窖內用草掩蓋比陸西合收帳回廟不見張賞候至次午不回附近訊問無蹤即赴他處嗣經村人董招玉見屍投約往看陸西合踵至認屍報驗獲犯將相沅杰依律擬斬監候魏時運董招玉依律擬絞監候具題到部部以一命三抵情罪繁重和沅杰與張賞口角並無深仇積怨何以造言誣讒魏時運董招玉受僱傭工並無可畏之威何以一聞開鎗之語遂各無奈俱下毒手均非情理並以原揭此案經臬司駁審兩次而承審官於此等情節未能訊及尚有疑質未便率覆等語駁駁駁後相沅杰旋以犯供翻異出死入生冤沉三命京控此該省辦理醴泉一案之大略也乃臣等檢閱全案供招相沅杰窖內於九月下旬見屍於十一月初間經董招玉控告既非窖主具報亦非該縣訪聞該縣十一月十四日驗屍陸西合寓距村不遠之棋杆鎮已經鄉約相鳳觀等於十三日傳至當在屍場訊供並



非二十八日拿獲審中屍係赤身而原詳增衣袴鞋襪數事尤堪詫異是該縣陳西庚之草率定案枉坐人罪已無疑義獨無解於巡撫臬司之始若平反巨案繼而刪改供招終且徇庇僚屬也查相沅杰在府屢供九月初十日傍晚回家經其妻董氏告知是日下午與媳孟氏在門首縫衣來一鐵匠戲言調謔等語相沅杰氣忿往詢陸西合知係張贊經過其門隨囑陸西合張贊來馬房請話因而叢毆勒斃是起衅之由既與原題不符陸西合供於九月初間由郭村至安家村初六日至棋杆鎮趕集初七日至相家橋初八日到東莊住廟並無六月即行住廟之說是住廟之日又與原題不符且張贊既死之後次日清晨相沅杰到廟三次催促陸西合起身陸西合供亦相同陸西合何以不向相沅杰根究張贊下落即肯他行兩月有餘訪尋全是虛詞見屍初不直認十一月十三夜相沅杰一井與陸西合密談許久不許巡役李七出外同談有相沅杰李七生供及陸西合原供可據是陸西合於張贊之死知情與否實在疑似之間承審官並不究直於詳文中改爲事前陸西合他出事後陸西合他往以省均藤謂非增減原供希圖結案而何陸西合定擬經年翻供後始於六年十一月二十九日由府派員拿獲相沅杰到案乃縣詳稱五年十一月二十八日拿獲陸西合府詳卽作爲五年十一月二十八日拿獲相沅杰以消弭原審失入之跡此案由縣詳至具題幾及兩年故揭帖中將臬司批駁前案四次卽作爲批駁後案二次以掩飾

命案稽緩之跡且此案既委別官審理陳西庚卽不當會審定案後既知原審官草率定案枉坐人罪並不附參謂非有心徇庇而何此案出入增減率意徇行不獨部駁准情酌理若發其徇庇之私卽京控亦抵隙蹈瑕正指其改供之謬乃審斷如此則在縣草成招之案固不足爲憑卽在府歷歷如繪之供亦恐難爲據相沅杰既死卽等以爲一案之出入猶輕而通省之欺蒙所關甚重也軍興以來官審於刑名之學大都不甚講求而每遇部駁必執原題每過京控必苛原告案案皆然省省如是已成牢不可破之鋼習殆非所以重人命而慎刑章也此案層折既多疑竇百出卽等未便一一覆陳已將全案卷宗擇要咨交刑部詳勘駁斥惟陝西距京太遠山部提審往返殊形拖累可否飭下陝西撫卽督同新任臬司張煦虛心訊鞫以成信讞該臬司素習刑名甫蒞新任自不敢再蹈掩飾迴護故轍至此案應行議處之撫卽馮譽駿以下各員應俟結案時再由部卽奏請分別辦理以示懲儆上諭額勒和布張佩綸奏特參陝西醴泉縣命案原題改供徇庇請飭提訊一摺據稱陝西醴泉縣相沅杰故殺鐵匠張姓一案該撫定擬具題前經刑部議駁檢閱命案供招與原題不符有刪改供招徇庇僥倖情事等語此案著葉伯英督同新任臬司張煦虛衷訊鞫據實具奏以成信讞毋得稍有迴護餘著照所議辦理○甲寅諭軍機大臣等張樹聲奏法越和議既成北圻人心將渙密陳愚慮等毓英唐炯奏法越近無戰事籌商布置情形

倪文蔚奏據探近日邊情各一摺覽奏均悉法人逼越訂約全振該國利權中國保護藩服斷非口舌所能爭現在惟以保守北圻固我門戶聯絡劉軍不至潰散最為緊要唐炯務當懷遠盡次諭旨迅赴前敵不准稍涉遲延○劉秉璋奏<sub>臣</sub>於本年八月十五日承准軍機大臣字寄光緒九年七月二十九日奉 上諭浙江於潛縣向產白朮近聞安徽黃山所產白朮亦有佳者著劉秉璋裕祿卽於該處採辦大生野朮不拘多少解交內務府應用將此各諭令知之欽此遵 旨寄信前來等因承准此<sub>臣</sub>當訪詢在城紳士咸謂於潛素稱產朮數百年來挖掘殆盡本處鄉民往往以椎朮冒充其天生野朮出產甚為稀少而省城大藥舖於於潛天台仙居各處深山以零星採覓轉有得其真者卽一面飭司道委聚積藥味之員前往於潛縣設法採購許其不論價值惟求真正野產方為合式又於省城藥舖內逐細推求迄今半月有餘委員未能購到僅於省城著名富有之慶餘堂藥舖罄其所有購得白朮四斤據稱係頂上之品復取他舖所稱野朮與之比較皆弗如遠甚除專弁齎交內務府查取外理合恭摺陳報聞○丁巳上詣 慈寧宮行禮○己酉劉錦棠奏新疆巴勒庫爾之南回部坎巨提向來按年進貢沙金該項自俄則項前於光緒四年呈進經大學士前督辦新疆軍務<sub>臣</sub>左宗棠奏奉 諭旨飭理藩院議奏據案賞給大緞二疋由左宗棠就近發給祇領業經欽遵辦理在案茲准幫辦軍務廣東陸路提督<sub>臣</sub>張曜咨

稱現復據該頭目米爾阿扎呈到進貢沙金一兩五錢已將例賞大緞二疋發交米爾阿扎祇領咨請具奏前來臣覆查無異除將所進沙金一兩五錢咨送內務府呈進外謹恭摺具奏下所司知之○辛酉諭戶部尚書額勒和布理藩院尚書烏拉喜崇阿都察院左都御史延煦總管內務府大臣廣順均著加恩在紫禁城內騎馬○賞給京師八旗及綠步各營官兵一月錢糧○賞給食餉之間散宗室覺羅人等及宗室覺羅孤寡錢糧○壬戌諭李鴻章奏順直各屬向有王公等府莊田請飭將減收租數行知州縣等語本年順天各屬水災甚廣小民困苦異常朝廷虛念災區業將錢糧分別蠲免所有王公等府莊各京旗莊田著卽自行察看災歉情形應如何減收租數之處行知地方州縣出示曉諭不准莊頭等將已減之和朦混舞弊其內務府革退莊田頭歸官代徵地租香燈租步軍統領衙門西河歲修地租及東陵承辦事務衙門永濟庫等地租事同一律並著一體減收分別知照曉諭以紓民力而除弊端○癸亥左宗棠奏淮南各屬修築范堤於本年三月間臣親往查勘當將籌辦情形具奏聲明工竣開單奏報在案旋據各工員先後呈報工完經臣派委道員陳鳴志前往察驗自五月十八日起至二十三日止周歷拋茶豐利角斜掘港等場共工長一萬一千七百八十一丈又順驗小洋口石涵拋茶場稍堤高寬丈尺一律如式共用土方工料銀十萬五千五百九十五兩有奇內有道員胡光墉捐錢五萬串合銀三萬一

千一百六十八兩一錢一分餘動用淮南新商票費均屬實用實銷毫無虛糜謹開清單恭呈 御覽伏  
思淮南通泰兩屬各鹽場界在海濱地居低下風潮之患歲或有之光緒七年泰屬新伍等場海水上溢  
猝遇奇災事後賑撫所傷已多今就范堤舊基擇要修復又於各場外廣建避潮礮座或增護堤或補殘  
缺或修涵洞或建壩座數月辛勞之力收百年利賴之功本年伏汛運河水勢洶湧爲歷屆所無兼之  
七月下旬又遇颶風驟雨沿江圩岸多有被衝之處而各場民燠隨獨化險得安已得新堤保護之益小  
洋口石涵爲通泰各州縣農田洩水要區今涵加砌高竟工程格外堅實裏下河水屆底水極大即將新  
修三孔齊放內水滔滔外洩是以運河水勢幾至漫堤而吳河低窪田畝竟未有一處被淹已得新涵宣  
洩之益成效昭著萬竇歡呼督辦堤工署淮揚海道徐文達始終其事苦心經營在事文武員弁隨同該  
道於颶風炎日之中循行洲度奔走不遑得將一萬數千丈險要堤工一律修築完竣實屬異常出力可  
否容臣擇尤奏獎以示鼓勵之處出自 恩施待 旨該部知道單併發在事出力員弁准其擇尤保獎  
毋許冒濫○甲子諭寶器閣撤欽奏請將崇文門委員先行解任撤委一摺崇文門委員內務府郎中煇  
揚阿被參如拿勒勒各節業經查有確據該員供詞狡展著先行解任撤委嚴訊○乙丑諭軍機大臣等  
國子監司業潘衍桐奏粵省海防宜多用土兵不宜多調客兵現在淮洲各軍到粵務宜區分地段勿與

土兵雜處倘省城兵力尙單卽責令總兵鄧紹忠鄧安邦添募數千百名亦非難事不必取材異地等語  
著彭玉麟張樹聲倭克儼文蔚酌度情形妥籌辦理另片奏宜擇紳士總辦省團查有李兆棠麥寶常二  
員熟悉團練事宜著專意委任防務必有起色等語並著彭玉麟等酌議具奏原摺片均著鈔給閱看將  
此由五百里各諭令知之○岑毓英奏上等於光緒九年八月初一日接准軍機大臣字寄光緒九年七  
月初十日奉 上諭雲南素產五金乃大地自然之利該省銅政久經廢弛本應整頓規復以資鼓鑄而  
和民用此外金銀鉛鐵各礦亦復不少自宜早籌開採以廣中土之利源實爲裕國籌邊至計惟經費較  
鉅籌款維艱近來各處開採煤礦皆係招商集股舉辦較易若仿照辦理廣招各省殷實商民按股出資  
與官本相輔而行則衆擎易舉事乃克成前據岑毓英奏整頓銅務章程五條業經戶部議復准行昨據  
署左副都御史張佩綸奏稱招集商股開採滇礦爲富強本計不爲無見岑毓英唐炯身膺疆寄於滇礦  
務必能留意講求實心經營卽詳細會商妥速籌辦新任藩司龔勿圖到後並著飭令將籌款招商等  
事妥爲經理總期事在必行毋得視爲不急之務日久辦無成效坐失事機至各處礦苗應如何先行相  
度或仍應購買外洋機器以利開採均著像爲籌議一俟款項集有成數卽可克期興辦不致遲誤張佩  
綸原片著鈔給閱看將此由四百里各諭令知之欽此 臣等跪誦再三仰見 聖主裕國足民利用厚生

之至意伏查雲南銅政廢弛已久籌辦規復實目前最不可緩之務前在藩司任內博訪周諮詳求利弊酌議章程五條詳由臣等奏蒙 勅部議覆准行在案惟是開辦礦務誠如 聖諭經費甚鉅籌款維艱現值庫帑支絀之際恐不能辦理裕如是以前議章程即請仿照公司廣招商民湊集股分復因招徠尙需時日京運未便暫停不得不先由官辦於東川永北等處遴委官紳分投開採銀銅各礦究之兩權其利官辦則廠員扣平加秤爐戶積欠走私種種弊竇防不勝防商辦則採苗開礦置器搭爐悉由各商出資自爲經理官不過隨時保護體恤採獲銅斤除供京運外餘銅止收稅釐聽其售賣至於銀鉛錫鐵亦止照例納課既免虧欠之弊復省稽察之勞以簡馭繁有利無害此商辦便於官辦之實在情形也從前滇省採礦概用土工承平時民繁財富每廠砂丁動至數萬人力強盛不藉機器亦可開採千百萬斤今則本省戶口凋殘招集不易丁力既薄而一切洩水通風等事亦實非人力所能施者若不參用西法恐難收事半功倍之效臣等前請勸撥庫款置買機器經戶部以搬運不易且虞損壞無用議駁在部臣爲慎重庫款起見自屬遠慮深謀惟 國帑不可虛糜而成法亦難過執臣等再四思維現既辦理招商一切置買機器及應如何僱募匠人施用修理之處卽由商局自行籌畫官不過問商情嗜利遇有奇巧省工之器自必多方購求既不輕用庫儲復能有裨廠務募砂丁以待流亡之集備機器以補工力之窮

實屬並行不悖此土法宜參用西法之實在情形也臣等忝膺疆寄值此時事多艱凡可以利國利民之舉自當實力講求況礦廠爲滇省當務之急竊無旁貸往返商酌意見相同查富商大賈多在閩粵上海一帶地方而上海尤爲總匯之區須於彼處設法招徠始克迅速集事至現在本省商民零星湊集者亦許附入股份以期衆擎易舉應請於雲南省設一礦務招商局綜理開採各務並於上海設一駐滬辦理雲南礦務招商局專司招集轉運各務除前委廣西補用知府張家齊候選通判關桐青承辦招商外擬添派候選知府卓維芳前江蘇候補道胡家楨等分別辦理由臣等刊刻木質關防給予札委飭令迅速妥辦庶彀策羣力較易圖功此外如尙需添設子局及往來奔走之員仍隨時察酌情形遴委官紳經理藉收臂指惟事屬創始頭緒繁多應俟三四月後辦有規模再行詳擬章程具奏立案用紓宸廑得旨據奏雲南礦務擬設局招商開辦即著該督撫妥爲經理詳擬章程具奏○諭吏部奏遵議處分一摺陝西巡撫馮舉驥鹽法道常瑛均著照部議卽行革職○丁卯諭瑞聯奏崇文門委員煖揚阿因案撤差派員接辦並自詣議處一摺煖揚阿被參一案前派寶器閣散銘查辦瑞聯失於覺察自詣議處著俟定案時再降諭旨○前禮部左侍郎殷兆鏞卒賜卹如例○戊辰諭軍機大臣等北洋沿海各口地段甚長應如何扼要布置宋慶一軍素稱得力究以駐紮何處爲宜著李鴻章詳籌調度○己巳諭錫珍游白



川奏職官互相稟揭請交部訊辦一摺據稱通州西中二倉帶班章京岳興等稟稱本月十六日由戶部領得兵餉津貼銀兩限同首領回山不允分兩銀色查驗相符遲至十八日首領始行分放有剋扣情弊隨據該首領投遞稟單語涉支離等語事關剋扣兵餉必須澈底根究通倉首領鳳山著暫行解任交刑部訊辦章京岳興等著一併聽候傳質○辛未延茂奏奴才於本年八月二十五日奉 旨派往清河鎮粥廠稽察監放彈壓於九月初九日請 訓十三日抵廠十五日開放賑粥顧此災黎流離滿目卽鄭俠之流民國不過是也幸賴 聖恩綢繆拯此餘生復經府尹周家楣籌備棉衣三百件奴才募捐棉衣二百四十件先儘極貧災民陸續散給罔不感泣同頌 皇仁乃於十月二十一日奴才督同委員正在監放時突有腰繫黃帶二人並無頂帽帶領悍奴數十人奇裝異服形類痞棍在廠門擁擠嘲笑戲謔領粥婦女奴才飭役彈壓乃該痞棍等恃眾毆差圍繞廠門叫罵並揚言我係宗室公戚姓住泰公府奴才曉諭此係奉 旨散放賑粥雖係宗室亦不准滋擾而該宗室益肆叫罵非常兇悍彼時廠內千數百災黎亦齊聲叫罵同鳴不平皆欲得該宗室而甘心焉奴才誠恐激怒羣黎互相毆鬪勢必釀成巨案趕緊督同委員等曉諭饑民不准出廠門一步復調派捕盜營兵帶領洋鎗刀矛守護賑倉幸無激變情事足以慰 宸庥而該宗室人等咆哮多時亦遂引去奴才猶恐其假冒宗室潛令委員改裝易服訊之該宗

室家丁云係東單牌樓蘇州胡同泰公府姓載赴官署上墳回京奴才復飭妥弁前往昌平州境內官署地方詢之土人果有蘇州胡同泰公府墳地前日來此上墳云云證以奴才聞見似非假冒宗室者伏念皇上特沛賑災黎凡有人心者固不憚憫乃竟有兇悍不法如該宗室者若不據實糾參將不畏懼不恤饕餮之謂何且素知清河鎮地方素多土棍目覩此番肆擾勢必因而生心不惟敗壞朝廷紀綱且恐激怒羣黎因怒生變其勢轉難收拾至於該宗室系出天家議貴親臣下何敢妄瀆惟該宗室肆擾賑廠虐及災黎負聖恩而玷家法尚不僅貽臣下羞奴才職司彈壓若不據實糾參上負朝廷下慚百姓其應如何懲辦之處伏乞宸斷上諭光祿寺少卿延茂奏特參宗室騷擾賑廠請旨嚴禁拿辦並請飭量撥營兵彈壓各摺片據稱本月二十一日清河鎮地方突有宗室二人帶領悍奴在廠門肆擾並聲稱係宗室公載姓住泰公府等語著宗人府查明具奏嗣後各廠如有騷擾情事無論宗室旗民人等卽著拿交各該衙門照例懲辦所請撥營兵彈壓之處著盛天府酌核辦理○以寬閭閻著戶部右侍郎○王申諭陳士杰奏黃水復漲漫溢齊東蒲臺利津等處現籌賑撫一摺據稱九月二十八至十月初一等日風雨大作河水復漲霜降以後無異伏秋大汛濟陽齊東蒲臺等處堤埝均有衝決漫溢情事利津縣近海村莊淹斃人口甚眾業經委員分投拯救現飭趕緊賑撫等語東省屢遭水患災區

甚廣此次節迎霜降又復漫溢爲災小民蕩析離居覽奏實深憫惻著陳士杰飭屬迅速查明被災戶口認真撫恤並將衝決堤埝趕緊堵築工賑兼施以副朝廷軫念災黎至意○癸酉諭軍機大臣等據御史丁振鐸奏請飭米慶增募勇營扼守關外及旅順礮臺並令曹克忠招募津郡民勇自爲一軍等語所陳尙爲切要著李鴻章酌議具奏○諭軍機大臣等有議及防務者謂磚石礮臺易被轟破必須護以厚土使礮子陷入不炸至開花彈從空而下藥庫兵房往往被燬尤當設法豫防並講求清野之法彼族船堅礮利海上難與角勝宜於陸路嚴密扼守將沿海要處分設陷阱地雷並設伏兵彼如登岸前後截擊自可得手又津郡辦理團練易於成軍但須嚴切約束勿任恃衆橫行妄挑外衅以上各條著李鴻章一併詳加審度酌議具奏○甲戌永定河漫口合龍前得處分各員准予開復并獎敘出力員弁有差○內閣學士洪鈞奏請開缺允之○乙亥林肇元奏臣於本年三月二十二日將勸化苗民改裝情形恭摺具陳五月初五日准兵部火票遞回原摺奉 旨知道了欽此欽遵在案臣當卽恭錄行知該地方文武遵照飭仍舊爲開導毋許稍有勉強擾累嗣於六月間復據統帶練軍委用提督陶茂林會同地方官將鎮遠黃平清平施秉凱里各處續行改裝苗民三千一百五十二戶丁口一萬二千九百零六名造冊呈報前來臣查核無異伏思化苗固宜改裝以革其面尤貴設學以革其心必使之讀書明理陶染漸深變化自

易現經選派候補知縣梁貢璆將臣所刊訓苗義學章程功課暨編輯族譜標本婚喪祭簡明儀節並多購小學應讀各書攜往苗疆各屬會同地方官實力督勸隨處整頓持之以久冀克有成以期仰副我聖主教澤覃敷一道同風至意報聞○志和丁憂解任以承德署理察哈爾都統○丙子李鴻章奏准軍收支款項業經截至光緒七年十二月底止列爲第十案報銷於光緒八年十二月十七日具奏奉旨該部知道單併發欽此并經循例造冊送部接准部覆按冊核銷在案查部定報銷新章各省向係造冊者無論八年八年前後仍舊造冊送部核辦等語現在接辦光緒八年一年准軍收支款項第十一案報銷自應仍舊造冊送部以歸劃一伏查准軍分駐徐州宿遷江陰靖江吳淞各處銘武馬步十八營一哨業經奏明撥歸江蘇支應除將揚州淮安糧臺放過八年正月起薪糧正雜各款同提督唐定奎分撥銘字水師六船截至八年底止餉項均歸江蘇防營案內入收彙銷外其餘分防直隸保定天津北塘正定滄州等處護衛親軍仁盛銘楚馬步水師共計三十九營又廣東水師提督吳長慶所部慶字親兵六營原駐山東嗣奉調援護朝鮮並各營局護運餉械哨棚統歸淮軍案內彙冊請銷今自光緒八年正月起截至是年十二月底止列爲第十一案所有營哨官弁員名勇夫開收總數征防處所先經造冊分咨軍機處戶兵部備查並照部章將支給正雜款項及截清欠餉各數目分別彙開清冊附錄例案章程聲明

以後有無增裁每三箇月開報一次亦已截至光緒八年十二月底止季報清冊先後分咨查核以上淮  
軍馬步水師各營並隨營辦事支應等差文武官弁親兵勇夫薪糧口糧正雜各款並柴薪斤重價值駐  
驛餽養車輛僱價均循前案楚軍營制與奏定章程及歷屆准銷成案分別截清起止日期接續造報湘  
平折實庫平仍扣雜款一分平餘又馬隊倒補馬匹係照駐紮省分營驛例價核給水陸轉運餉項僱用  
車船夫工價腳核計斤重程途里數按照軍需則例歷屆准銷各案支發飭據淮軍報銷局司道逐款清  
釐查核得管項下上屆截至光緒七年十二月底止實存銀一百二十六萬八千四百四錢六釐一毫  
六絲九忽一微新收項下綜計浙江四川湖北山東等省協餉並江蘇藩關釐局額撥軍餉兩淮鹽釐及  
本案扣存平餘同甯古塔防軍撥還軍火價值等項共銀二百六十萬二千八百二十六兩八錢八釐五  
絲八忽九微以上管收二項共銀三百八十七萬八百六十七兩二錢一分四釐二毫二絲八忽內登除  
專案奏明撥還常勝軍欠洋行帳目合銀三萬四千七百十五兩五錢一分二釐八毫八絲二忽又淮  
軍分駐江南馬步營哨奏明撥歸江蘇支應由揚州糧臺放過餉項應歸江蘇善後防營報銷局入收並  
銷銀二十一萬九千四百九十六兩八錢一分九釐二毫一絲二忽又撥放金陵機器局製造工價應歸  
該局收銷銀二萬兩又附列專冊請銷補放淮軍各營光緒七年十二月底以前欠餉銀六萬九千一百

四十八兩八錢九分五釐一毫七忽五微又附請專案奏銷洋鎗礮隊教習通事人等辛工礮役輪船薪糧並購買外洋軍火價值運津礮械輪船水腳與天津行營機器製造局工料用欸及操練後膛洋礮拉礮車馬喂養夫工倒補馬價等項計四冊共銀一十六萬五千八百四十兩一錢九分八釐七毫八絲三忽實計收銀三百三十六萬一千六百六十五兩七錢八分八釐二毫四絲三忽五微開除正雜各欸遵照部議酌定軍需報銷章程各歸各部核銷計應歸戶部核銷銀一百五十九萬六千四百三十七兩九錢六分八釐七毫三絲一忽應歸兵部核銷銀三萬一千八十三兩一錢七分六毫五絲三忽應歸工部核銷銀四萬一千八百六兩九錢九分九釐九毫三忽統共計銷銀一百六十六萬九千三百二十八兩一錢三分九釐二毫八絲七忽實存銀一百六十九萬二千三百三十七兩六錢四分八釐九毫五絲六忽五微已接支光緒九年正月起淮軍馬步水師營哨正雜餉項並購製西洋軍火器械價值工料等用及儲備緩急不時之需歸於後案籌管項下滾接造報等情具詳請奏前來臣查淮軍分駐直隸山東江蘇等省辦理江海防務上年朝鮮內亂就近由山東登州調撥慶字等營航海前往援護剿平亂黨今仍留駐該國保護屬藩深資其力刻值海防喫緊督飭各軍加意操練以備調遣所有造報光緒八年正雜欸項逐欸查核均係循照歷辦成案撙節支發實用實銷並無絲毫浮冒下該衙門知之○丁丑以奎燾

爲內閣學士○諭兵部奏遵議處分一摺前任吉林將軍銘安著照部議降二級調用○奕齡等奏光緒九年九月初九日內閣奉 上諭給事中鄭溥元奏宗室婦人控告概不收呈咨部後倘原告不到速爲銷案以免拖累請飭核議章程並補入則例等語著該衙門議奏欽此○等查原奏內稱宗室婦人往往驕奢無度家產湮絕糾合匪黨肆行訛索不遂便成鬭毆其呈控於步軍統領者十有九虛追移咨刑部代傳被告又恃貴冑之親延不到案而從中關說之人皆其羽翼向被告嚇逼錢文非大遂其欲彼此分肥決不和息此風不可不除請飭步軍統領衙門凡宗室婦興訟非有親丁抱告概行擲還若既收呈咨部原被告須一齊並傳倘被告先到原告不到應即開釋被告速爲銷案不必拘定兩月之期若到案情虛卽責抱告等因奏奉 諭旨著 衙門議奏嗣又據步軍統領衙門咨稱宗室覺羅婦女控案向遭抱告具呈如係喊控到案卽飭另尋抱告之人始與接收如無抱告者照例不與審理抱告到案卽錄取該抱告供詞咨部應否查傳被證照例由刑部會同宗人府訊辦其在街巷與旗民人等分爭鬭毆扯赴官廳解往本衙門者該宗室婦等一經到案亦卽令其尋找抱告往往不及遣抱情願跟同官人赴案爲詞於錄取供詞後仍交原辦官帶出取保聽傳向非原被一併傳送等因到部查例載宗室覺羅婦女出名具控案件除係呈送忤逆照例訊辦外其餘概不准理如有擅受照例參處倘實有冤抑許其

成丁弟兄子姪或母家至戚抱告無親丁督令其家人抱告官爲審理如審係虛誣罪坐抱告之人若婦女自行出名刁控或令人抱告後復自行赴案違刁及擬結後復控者無論所控曲直均照違制律治罪有夫男者罪坐夫男無夫男者罪坐本身折罰錢糧等語宗人府例文亦大略相同定例本極周密如果實力奉行遇有宗室婦女出名具控必責令其戚屬等抱告無卽不予收審則應准之案已少准理者一經審虛卽按例將抱告嚴行治罪彼婦女違刁者將爲其戚屬等計必不敢輕爲嘗試此立法之本意亦慮訟之良規也該給事中奏稱宗室婦女興訟非有親丁抱告概行擲還等語係爲杜絕訟源起見核與成例亦屬相符應如所奏辦理若步軍統領衙門所稱宗室婦女在街巷與人爭毆扯赴官廳往往以不及遣抱爲詞固亦事或有然取供後既交原解官帶出取保聽傳爲時從容並非迫不及待仍應責令遣抱赴審方准送部則其狡誦之習更不待訊問而自破至例載原告兩月不到案聽審卽將被告釋放拿獲原告治以誣告之罪等語係指已經准理以後而言該給事中所謂速爲銷案不必拘定兩月之處亦係爲平民免致拖累起見然上等竊以爲與其嚴懲於已准之後莫若詳慎於未准之前似應參核例意酌量辦理臣等公同商議應請嗣後宗室覺羅婦女呈控案件仍照例令親丁人等抱告如係喊控及在街巷與旗民人等爭鬧扯告者亦均令找尋例應抱告之人予限十日到案錄取供詞同被告一齊送



部倘逾十日之限並無抱告投到或令僕婦及年未及歲之僱工作爲抱告者概不准理即將被告開釋  
餘仍照定例辦理庶刁風可以稍息而無辜下人亦可少受拖累矣 上諭前據給事中鄭溥元奏宗室  
婦人控案請飭議章程非有抱告概不收受原呈原告不到不拘兩月之限卽爲銷案等語當諭令該衙  
門議奏茲據宗人府刑部會議具奏宗室覺羅婦女呈控案件例應遣人抱告不准自行出名至該給事  
中所請不拘兩月之限卽爲銷案原爲免累平民起見惟嚴懲於已准之後不若詳慎於未准之先嗣後  
宗室覺羅婦女具控案件仍照例准令成丁弟兄子姪或母家至戚抱告無親丁者令家人抱告限十日  
到案同被告一併送部如逾限並無抱告投到或非例應抱告之人概不准理並將被告之人開釋以省  
拖累鄭溥元所奏著毋庸議○刑部奏各省軍流徒犯脫逃日衆亟宜變通整頓又五軍內附近邊邊  
遠視流罪道程遠近相同與其沿襲虛名徒滋稽難何如量加刪減明示區分諸 旨飭下各省督撫體  
察地方情形悉心妥籌以維法紀得 旨如所議行○是月法蘭西國使德理固回國參贊謝滿祿署理

東華續錄

光緒五十七

臣朱壽朋敬編

臣潘鴻鼎恭校

十一月戊寅朔以李秉衡爲浙江按察使○廣西右江鎮總兵李維述以營務廢弛開缺○以王孝祺爲右江鎮總兵○已卯頒給熱河獅子溝 龍王廟匾額○辛巳命署都察院左副都御史張佩綸在總理各國事務衙門行走○諭御史張人駿奏此次記名御史之吏部郎中王琛沾染市習性情輕浮請飭察君等語著吏部堂官察看該員如果聲名平常卽行據實奏參○甲申寶箴閣徵銘奏 臣等奉 旨詳改崇文門章程已將尙賢劉恩溥所奏各節遵議具奏竊維崇文門徵收稅課係 國家維正之供正額盈餘均有定制京師爲萬方輻輳之區地僻首善惠商便民尤屬當務之急近來劣員借吏竊役奸商因緣爲奸遂至上虧國課下累民生爲害不可勝言亟宜設法整頓以重稅務而除積弊 臣等謹於尙賢劉恩溥原奏內所未經議及者酌擬十六條恭呈 御覽一嘉慶五年欽奉 上諭各關稅局如有訛案擾累等事從重治罪等因又道光二年欽奉 上諭嚴禁崇文門稅局需索竊弊等因應令該監督將 諭旨二道敬謹繕寫懸掛該衙門大堂俾資永遠遵守一奏派宜擇本屬也向來正副監督到任後事皆實

成奏派委員總理一切文則用印稿司員武則用印務參佐其人率以明白幹練心地端直者充選故能上顧國家正課兼可鈐制驗貨家丁免滋流弊近來或參以親故等人以致堂官家丁狎熟牽掣種種弊端在所不免正本清源必自奏派委員始一堂委宜戒濫派也奏派向止二員恐有別項差故則堂官派委員以佐之此項委員亦當以一二員爲是緣廉正樸實之品本不多覩而人多則牽制亦多近聞堂委之員多至十餘員或二十餘員不等非浮薄少年酒食微逐卽艱窘寒更喜事生風實於公務無益而宜裁汰以靖浮囂而杜擾亂一各口宜擇委員也崇文門向有分局例設於蘆溝橋東壩海運半壁店南口穆家峪張家口等處派員駐守以慎分司需人既多勢不能盡取本屬明幹人員悉派稅差致曠本職故向來監督每擇素誠之人量材器使然亦不容純用情面以私廢公且張家口東壩兩處中外商人紛錯於途查核甚非易事奸巧猾商藉端影射亟當詳遴明白曉事之員常川駐局中外茶商交涉倘有疑難卽稟明監督迅速行文總理各國事務衙門詳察辦理不得漫任冗員有妨稅務一蘆溝橋東壩半壁店穆家峪海運張家口等處口岸向設委員分駐稽察近年監督所派委員未能一律在局駐宿一切公事悉由家人書吏經手致滋流弊亟應申明舊章由監督飭令分司稅口委員輪班駐宿督同司役家人認真辦理以除積弊其各口委員每處祇需四員由正副監督各派二員庶免人浮於事一京城十三門向

來監督但派家人替役分駐巡查惟各門距務較遠委員耳目難周致有勒索留難等弊擬請嗣後安定  
山直朝陽東便廣渠左安永定德勝西直阜成西便廣安右安十三門均由監督揀派廉勤人員每門二  
員輪班住宿稽查不准曠誤違者參處所有十三門委員應需飯食津貼銀兩由監督酌量籌給奏明辦  
理一海巡宜調營弁也海巡向用家丁世家大族世僕老練或不敢恣肆妄爲近來仕宦之家僮多招募  
派爲海巡惟知藉端滋擾得財賣放比比皆然未革偷漏之弊徒滋勒索之端營弁究係官屬儘可行文  
步軍統領衙門調取來署將該衙門巡役清冊點交該弁該弁亦得海巡津貼當差並可勦奮矢志倘仍  
不得力卽由該監督自行參懲一光緒九年給事中樓舉善奏崇文門海巡請按名給發號衣腰牌嗣經  
該衙門奏稱若給予號衣腰牌轉恐恃有官物四出招搖流弊更甚且於密查偷漏益多窒礙等語竊惟  
該巡役無號衣腰牌則恃無查考肆意妄爲有號衣腰牌則奉官緝拿被拏者既不敢拒捕往拏者亦不  
敢詐擾至巡役藉詞密查實在搜求擷取無所不爲仍請 飭下該監督將巡役每名各給號衣一件並  
各給印花腰牌均寫明某門海巡姓名有訛索者准商民指名稟究庶幾真僞可辨而棍徒蠹役不得冒  
充如有僞造號衣腰牌冒充巡役者嚴行究辦其製造號衣腰牌經費准由盈餘項下開銷至巡役向無  
額數散漫無稽莫可究詰擬請 飭下崇文門監督將巡役酌定額數每門若干名務上及十三門共若

千名造冊咨報戶部查核嗣後每屆年終造冊咨報遇有更換隨時咨報一例載各關徵稅科則責令該管官詳刻木榜豎立關口街市並責令地方官將稅則刊刷小木每本作價二分聽行戶頒發遵照倘該管官將木榜不行設立或書寫小字懸於僻處希圖高下其手者查參治罪又例載已革之稅概行刊榜曉諭各等語現在崇文門未將稅則及已革之稅刻榜豎立地方官亦未將稅則刊刷頒發以致商民無從周知亟應申明舊例略加變通所有徵稅科則應由該監督認真詳刻木榜其例應免稅之貨逐款開明另刊木榜一併懸掛稅務衙門門外及十三門暨各稅口並由該監督將商稅則例現行比例增減新例及免稅各條刊刷成冊於每年八月初三日監督到任後發給各行戶經紀一本使商民共見共聞其刊榜刷書經費准由盈餘項下開銷一例載乾隆四十九年奏定丁梨脆棗最下之物不過近京所產即有興販亦止於肩挑背負嗣後應豁免稅銀庶近京小民不無所補等語嗣後除水梨係屬客貨仍照例收稅外至近京西山等處所產丁梨無論是否肩挑背負應一律免其送務徵稅蘆溝橋及各門亦不准私收稅錢飯錢違者懲辦一例載各關商民輸稅填寫收稅紅單二紙一給商人收執一送戶部查察其有不給紅單或納銀數多給票數少及私將紅單撤回多徵勒索者許商民首告究辦嗣後崇文門收稅擬請用三連票根一給商人一存該衙門一送戶部以備稽查如有前項情弊一經商民首告照例究辦

一例載崇文門稅課令本商自行完納若貨到而本商未至准店鋪代報納課等語惟往往有數年之貨該行到務呈遞驗片只寫一家字號易滋弊端嗣後貨物報門無論數家共一貨車總須各分各單不得數家併作一單僅寫一家字號致涉牽混至各門每日送務手本亦須將各鋪字號一一分寫不准籠統以杜行戶影射漏課及巡役朦混誣弊等弊一行次重責成也而實納稅必由行次原為事簡易責有攸歸乃日久相沿竟成作弊之首平日串通本處書吏隨事賄囑驗貨家丁寬放營私視為故事而該衙門所辦漏稅不過偶擊一二貧民或負私酒或賣鴿蛋者反為敲撲以示官威行次弊端反置不問是當飭奏委司員隨時逐行詳查倘敢仍前作弊立予嚴懲毋稍輕縱一崇文門弊端漏稅客貨該委員過堂時並不聲明罰銀數目輒先令畫供認罰追畫供後委員於原供內批罰銀至數百兩數千兩之多交坊親押勒繳殊屬不成政體擬請飭下崇文門監督嗣後遇有應罰之案除按照例定倍數擬罰外務須先將應罰銀數示知該商並於供內寫明令其輸服畫供不得刑逼勒罰所罰既有限制庶商民力能呈交罰款亦不至虛懸無著每月實收罰款若干分列貨物款項案由分計本稅銀若干罰款幾倍銀若干明示稅務衙門門首咨明戶部庶儆偷漏並有稽核一崇文門照例驗貨納稅放行不准留難勒索嗣後每日各門送到行李貨物到務無論天晚必須當日驗完不准押送客店延至次日方驗違者即將委員

監督參處一崇文門監督到任向係出示曉諭嚴禁官店至每日務上未經驗完之行李貨物押送店內有押至數日之久者其挈獲漏稅貨車有押至數十日之久者無官店之名有官店之實該店串通差役藉漁重利商民受累不堪爲歷年未除之積弊嗣後崇文門附近客店如敢容留務上交押之車准被押之人赴城喊控卽由該城御史將委員查明參處並將該店勒令封閉店商從嚴懲辦以上各條或參核舊例或酌擬新章總之立法必先防弊任事尤責得人應請 旨飭下崇文門監督隨時督飭委員認真辦理實事求是期於 國課民生兩有裨益 上諭前據光祿寺卿尙賢御史劉恩溥先後奏參崇文門委員家丁勒罰妄挈各節當經諭令寶璽閣敬銘查奏旋據御史張人駿奏瑞聯自請議處派員接充意存嘗試等語茲據寶璽閣敬銘奏遵旨查明擬陳並審明擬案及酌議章程各摺片此案海巡任福於已經納稅之吳大等梨獸及洋紙行貨車輒行妄挈並敢幫同委員問案實屬任意滋擾著照所擬杖六十徒一年在崇文門枷號兩月到配折責拘役委員解任內務府郎中煖揚阿任聽海巡妄挈復於並未漏稅之果行洋紙行及漏稅之白鳴鐘等案濫押多人用刑勒罰實屬荒謬著卽行革職正監督兵部尙書瑞聯於海巡妄挈防範不嚴並於煖揚阿違例勒罰聲名惡劣未能查明揭參該尙書前奏所稱煖揚阿無營私情弊意存開脫並派寶璽之姪兵部員外郎恩壽接充委員殊屬不知速嫌副監督鑲黃旗蒙古

都統克蒙額雖會諭令煖揚阿不可任意勒罰惟未經卽行查明亦難辭咎瑞聯克蒙額著交部分別議處委員印務章京玉祥於煖揚阿勒罰各節雖經回明副監督究未能阻止伊犁委員護軍參領英聯攜帶皮貨進城並未報明玉祥英聯著交部分別查議其雲南會館長班王福通州茶棧商人賈森呈控二案現據查明分別擬結東壩稅局委員輕車都尉英福於業經納稅之食茶單內漏未過硃實屬疏忽著交部查議餘均照所議辦理嗣後崇文門驗貨收稅該監督務當飭令委員躬親其事毋得假手書役人等致滋弊竇倘委員有貪婪劣跡定將該員及監督照現定章程分別懲處至商人漏稅自應照例議罰豈容任意勒索其肩挑貿易及谷屬車輛如查無應稅貨物概不准留難擾累著五城江南道各御史隨時查察該員役如有勒索情事卽行參辦並著該監督常川到署嚴切稽察毋稍疏縱寶璽等所擬章程十六條係爲裕課恤商起見卽著該監督飭令委員認真辦理力除弊端毋得仍蹈積習致干咎戾○祭先農廟遣徐桐行禮○丁亥諭御史劉恩溥奏東安門外宗室家開設賭局毆斃人命屍棺久未掩埋等語此案著宗人府會同刑部迅速訊明具奏○戊子岑毓英唐炯奏臣等於光緒九年九月十五日曾將法越近日尙無戰事暨籌商布置各情形恭摺奏報在案并發後承准軍機大臣字寄光緒九年八月二十四日奉 上諭法越搆兵以來北圻越兵雖幾次獲勝而河內未經克復法人據此要害之區北圻



終難自固現在法人直逼順化迫脅越南議約法使脫利百已至天津並有以兵船至廣東等衅之說無非意存恫喝肆其要求惟有堅持定見以折其謀但彼族詭詐多端非空言所能懾服全視邊防之能否得力以爲操縱近日河內一帶軍情若何越軍有無戰事岑毓英倪文蔚唐炯徐延旭確探情形督飭在防各軍嚴密扼守不可稍涉鬆動等因欽此仰見 宸謨慮運燭照無遺跪讀之下欽服莫名臣等於九月十七日續接主事唐景崧密函並據參將張永清稟稱探聞法人自劉團撤回山西後將其懷德舊營占踞在伯陽津次築立巨壘並擬由河內西門外修平大路直至丹鳳意在節節經營進逼山西已派南官預備夫役甄木等項爲修築之用南官黃佐炎前奉該國議和之諭仍以請戰爲辭亦不肯順從八月二十九夜有教匪四名率黨十餘人來至山西省城西關外之麻瘋村藏匿探聽軍情經劉永福於是夜派隊往圍該村捕獲教匪由南官訊明正法現在劉永福得滇省賠助三營軍餉已陸續招募成營廣西防軍亦分撥三營同紮山西參將張永清所帶滇軍二營又暫留興化附近駐紮緊急可以應援劉永福軍心亦較前穩固等情具報前來臣等伏查法人與劉永福屢次交兵未能得手遂避堅攻瑕運迫順化脅取和約今有兵船赴廣東等衅之說誠如 聖諭彼族詭計多端非空言所能懾服臣等惟有遵旨督飭防軍嚴加防守不敢稍涉鬆動前擬賠助劉永福軍餉已按月給銀五千兩作爲三營餉需尙有

軍火軍裝暨前後所助之費銀二萬金在外如此接濟劉永福諒能感激圖報以遏敵鋒現在駐紮關外  
尚有張永清徐世和陸春張世榮等四營分守大灘及興化一帶惟陸春一營係匪勇其餘三營皆係粵  
勇如山西喫緊時地抽往應援亦屬相宜目下秋深水涸彼族兵輪難於上駛不致稍有疏忽更不敢輕  
啟衅端 上諭覽奏均悉著唐炯懷遵前旨速赴前敵相機調度與劉聯絡策應力保北圻不得以現  
無戰事稍涉鬆勁○已丑諭本年各省直省辦理秋審人犯經刑部由緩決改情實者湖南省多至五起該  
撫臬司於秋讞重犯未能詳審核議著交部查明分別議處嗣後各將軍府尹督撫等務當督同所屬遵  
照定例酌核案情悉心究擬固不可失之刻嚴亦不可惑於救生不救死之說故從輕減總期執法持平  
無枉無縱用副明慎用刑至意將此通諭知之○諭吏部奏遵行察看司員據實覆陳一摺據稱吏部郎  
中王琛被參撈捕一節徧加訪察不為無因該員近來頗知收斂未聞有別項劣跡等語王琛著將記名  
御史撤銷○庚寅 上諭 壽皇殿行禮○辛卯諭御史屠仁守奏內外城啟門太早請申嚴門禁一摺  
廷旨理萬幾披覽奏章召見臣工不遑暇逸各衙門先時呈遞摺件由來已久若啟門過遲必致延誤  
惟申嚴門禁極關緊要迭經諭令該管大臣嚴密稽察著步軍統領衙門前鋒統領護軍統領申明禁令  
於內外城啟門時督飭官弁認真查察毋得視為具文○諭御史屠仁守奏近來外省游勇革弁多有潛

至京師假冒官職無所不爲又有兇惡棍徒滋事風動輒羣毆請飭拏辦等語肇畿重地豈容匪徒肆擾著步軍統領衙門順天府五城御史嚴飭所屬如遇有外來形跡可疑之人嚴切根究卽行驅逐回籍其無賴棍徒藉端生事者卽著嚴拏懲辦以靖閭閻○癸巳諭軍機大臣等倪文蔚奏近日邊情並前敵各軍籌備情形徐延旭奏遵出關日期現飭分別進規嚴防各一摺覽奏均悉法人於山西之丹鳳北甯之結林設險嚴備情形與從前不同在防官軍必須穩慎進紮嚴密布置不可稍形輕忽著岑毓英倪文蔚徐延旭唐炯督飭各營妥籌調度劉永福添募勇營漸次到齊惟係新集之軍能否得力越南議兵恐不可恃法人此番極意經營若任其僥倖則邊事益棘所關於大局者甚重務當飭令劉永福等妥慎進取盡力抵禦勿稍退縮河內設守已嚴猝難攻拔應如何避堅攻瑕誘敵制勝並宜相機妥籌徐延旭現已出關岑毓英接奉前旨諒已部署起程當此時機緊要該督撫尤宜和衷共濟隨時悉心會商妥籌方略以副委任斷不可稍存意見致誤機宜將此由六百里各密諭知之○乙未以景星爲兵部尙書○以恭鏗爲西安將軍長順爲烏魯木齊都統○諭軍機大臣等總理各國事務衙門奏海防緊要宜趁近患而豫遠謀山東要隘以烟台爲最著李鴻章遴選得力將領如曹克忠郭寶昌等酌帶數營扼紮烟台與沽塘旅順相犄角陳士杰當就本省現有各營嚴密布置○諭軍機大臣等聞越民將該王戕害禍亂

方殷著張樹聲統帶兵勇直達順化妥籌賑撫或由海或由陸迅赴事機毋任另生仙變后軍兵單著吳大澂馳赴該省幫辦並著李鴻章飭派丁汝昌統帶師船赴粵聽調前諭岑毓英統營赴防著迅速前進策應○內中電 諭張樹聲著迅赴越南宣布威德相機戡定一面令該國擇賢嗣位奏請冊封至或由海由陸著詳籌妥辦○諭給事中鄧承修奏請旨責令貪吏罰捐巨款以資要需一摺據稱該給事中所聞賊私最著者如已故總督瑞麟學政何廷謙前任粵海關監督崇禮倣效學政吳寶鋈水師提督翟國彥鹽運使何兆瀛鹽運道方濬師廣州府知府馮端本潮州府知府劉湛年廉州府知府張丙炎南海縣知縣杜鳳治順德縣知縣林灼三現任南海縣知縣盧樂成皆自官旗東後得有巨資若非民膏卽是國帑等語著彭玉麟將各該員在廣東居官聲名若何確切查明據實具奏另片奏阜康銀號開辦協辦大學士文煜所存該號銀數至七十餘萬之多請旨查明確數究所從來據實參處等語著順天府確查具奏○諭吏部等衙門奏遵行分別議處一摺瑞聯著開去兵部尚書並崇文門正監督差使仍留正藍旗漢軍都統之任所有應得降三級調用處分加恩著改爲革職留任崇文門副監督鑲黃旗蒙古都統克勤額著照部議降二級留任准其抵銷○諭吳大澂奏保薦人才一摺同知銜汪啟著發往直隸交李鴻章差遣委用○諭前署兩廣總督曾國荃著加恩在紫禁城騎馬○以崑岡爲吏部左侍郎奎潤爲吏部

右侍郎○西安將軍恆訓卒賜卹如例○予軍機處繕修清字檔冊人員內閣中書桂春等獎敘有差○致仕大學士載齡卒贈太子太保銜照大學士例賜卹並入祀賢良祠○己亥諭前據御史劉恩溥奏參貴州學政孫宗錫前任學政林國柱考試需案各款當令岑毓英確查具奏茲據奏冊委員詳查孫宗錫者試安順府時輒因供給將普定縣知縣彭億清之子鎖押並索取童生規費濫貢生員龍登衢復因考棚朽壞勒索各新生捐銀修理實屬不知檢束開缺貴州學政翰林院編修孫宗錫著即行革職前貴州學政林國柱雖查無濫收考官情事惟於家丁需案供應未能覺察亦屬不合業經另案革職即著毋庸置議○諭軍機大臣等現據張樹聲電報順化海口久爲法蘭陞出欽州路僻難行擬仍由龍州出關前赴越都等語師行以速爲主若道里遼遠轉餉遲滯於越事緩不濟急且據會紀澤電報法人現又添兵以鎮越亂則大兵前進尤宜取道便捷迅赴事機本日已諭令張樹聲毋庸赴越著改派岑毓英前往越南宣布威德倒平禍亂並令該國擇賢繼位奏請冊封至該督統兵赴越應由何路前往卽著隨時相機務期穩慎倘一時驟難進發仍著與岑聯絡策應堅守山西北甯等處以固邊疆門戶○先是張景釗奏查辦乾隆六十年福建倉庫虛一案奉 上諭科道職司糾察有風聞冒事之員閩省酌空繫繫卽別省科道等豈竟毫無聞見何竟無一人奏及著傳旨通行申飭嗣後遇有地方重大事件務當確實

奏聞毋得自同寒蟬致負素餐有忝百歲欽此○籍隸貴州今年會試之期同鄉士子北來者皆言貴州  
庫儲虧空市井蕭條周咨博訪衆論竊同並聞上年新藩司沈應奎撤任之際庫中僅存銀十數萬竊思  
民間小康之家其積蓄且有不備如是者何況巍然一省曾屹然一藩庫乎夫貴州界在四川雲南廣西  
湖南四省之間雖號瘠區實居腹地每歲地丁錢糧釐金稅課等項所入不過三十餘萬兩綜計所出則  
非一百數十萬兩不敷支應○朝廷軫念邊疆多方協濟誠以南黔爲川粵之唇齒滇楚又以南黔爲轉  
樞是以二百餘年宸謨廣運不惜指撥重款保護維持生其間者亦皆仰○生成家養之恩同深感戴  
方今藩庫若此則道府州縣之存儲不問可知庫儲空虛若此則市井之蕭索更可想見或謂兵燹之後  
徵收未能足額民氣遠離復元然臣又聞前任撫臣岑毓英交卸撫篆之時庫中尙存現銀四十餘萬何  
以事出經年遂令一省錢糧總匯之區其枯涸至於如是推求其故若非官吏相朦監守有侵挪之弊卽  
係支銷冒濫出入失撙節之宜如近日山西王定安浮銷庫款是其明驗當此之時責任其玩忽因循困  
窮而不之顧設一旦遇有急需末有不倉皇失措束手而莫知所籌者臣在京供職已閱十年故鄉情形  
今昔迥殊救敝補偏未能懸揣相應請○旨飭下雲貴督臣岑毓英悉心稽核如有侵蝕冒濫等弊指名  
嚴參毋稍徇庇將如何而可以利用如何而可以厚生思豫防於先事免貽誤於臨時且事關一省國

計民生非窮民之責而誰責歟臣既有所聞不敢不據實直陳又張佩綸奏臣維黔省夙稱貧瘠大亂之後財用匱乏戶口凋殘休養生息端賴良吏應職寄者宜如何潔己率屬節用愛人以副 朝廷委任不意林肇元貪黷營私大爲黔民之害也司庫存儲三十餘萬皆累培撤歷年所積蓄岑毓英調撫福建林肇元已據驛符獨居藩署以給役食散勇糧爲名私取庫款數萬兩物議沸騰胥吏譁噪乃密予司吏巨金綳縫繒釋而營勇實無滋事遺撤之舉裁汰者何營領銀者何弁盡屬虛構之詞此與王定安署山西藩司司庫月影如一轍而林肇元乘由司撥撫之際詳奏出於一手消納無形婪貪尤巧以黔幣之又細協餉之艱窘而開款驟用十餘萬兩卽非巧取亦屬濫支奏銷有案不難澈底根究耗庫儲其罪一也黔捐皆林肇元主持局員四出委任非人卑賤如市僧且多一局則有一局之浮銷多一員則有一員之侵蝕甚至兩局同地而版數迥殊兩員同局而價目迥異詭秘離奇令人不測其最謬者該撫在臬司任內令其弟載亨來京辦捐委公款於子弟已屬非宜載亨則與市商部吏因緣爲奸罔利鉅萬以大八成知府分發江西現任南安府知府其後停捐限滿黔捐自弊叢生吏難究詰使冒捐輸其罪二也昭通案內濫保廢員已爲科 孔憲穀所糾矣其倚爲心腹耳目者則有羅應旌汪元慶兩人羅應旌在直隸夸詐不實繼繼回黔林肇元則信任之初委巡防局總辦生事擾擾增局員虛糜經費歲萬餘金近委

署貴州道待志恣睢必至貽誤汪元慶與林載亨結爲兒女姻親該撫以應否迴避請示夫聯姻在先同官在後人亦諒其無私今以道府而與撫臣胞弟聯姻豈嫌自好者必所不爲而林肇元果性絕攀援屬僚亦當有所不敢汪元慶在都以賭博爲生計以演劇爲逢迎本一華嵩奔競之徒與載亨比而自託於撫臣實於黔省吏治風氣大有關係任用劣員其罪三也林肇元白擢黔撫志得意滿以聲伎自娛齷齪祈福事巫祈禱屬員接見漸稀其屬化之媚酣朋宴藩司沈應奎雖爲左宗棠所賞實亦諂媚小人附和撫臣瞻徇僚屬絕無振作黔省官弁猥雜鑽刺成風撫藩皆徇情諂俗之人干謁苞苴因而競進林肇元之家丁黃德培於私運庫款時乘機獵取撫臣爲所挾制無如之何於是漸作威福聲骸頗熾浮躁之徒趨之若鶩郎岱驛同知蕭榮椿與該撫同籍貴縣亦有戚誼恃其親信頗涉招搖捷徑四通倖門大闢敗壞吏治其罪四也黔省游兵散勇甚衆剽劫爲害附近省垣卽多盜竊之案川滇咽喉以黔中吏治不修軍政不振相率入黔上自興義下至遵義徒類勾結實繁民無安枕民或縛盜送官官則釋縱之或縛盜並贓物送官官則僅杖責之遞解之地方不靖盜以省緝捕之繁營伍不除盜以覓裁汰之患昭通之匪窟黔省巡撫以殄盜敘績鉅張失實而歷年緝捕之廢弛盜賊之縱橫已可概見比聞劉金山向大五餘黨出沒如嘯聚如故文武既諱匿不言該撫亦含糊不問縱容盜賊其罪五也滇黔接壤黔省漢



黔亂亦甚上年岑毓英歷陳滇民困苦一疏且如此黔民可知乃黔民復業歸耕官吏勒取開荒規費以困之窮男鬻女者比比也肅清十餘年而郭田榛蕪山田槎枿林肇元輒以承平既久腴熟必多地丁錢糧一律苛徵於是架糧之弊起矣架糧者如額編徵甲死則責償於乙東荒則責償於西架糧之弊與加糧等丈量之具催比之吏紛擾上下黔民益不聊生責定父老以糧重至撫署泣求林肇元怒而詞責率置不理虐待殘暴其罪六也臣初以黔省去京過遠道路傳聞客或過富而參之該省奏報劣跡章灼不能無疑嗟嗟黔民何以堪此伏望 朝廷將林肇元卽行罷斥 欽派大臣秉公查辦據實糾參以儆官邪以蘇民困邊民幸甚先後 命岑毓英確查具奏至是內閣奉 上諭前以御史張鏡鈞著都察院左副都御史張佩綸先後奏參貴州庫儲空虛林肇元貪黷營私等款迭經諭令岑毓英確查具奏茲據查明據實奏貴州巡撫林肇元賦性優柔遇事巡避與署藩司糧儲道松長當側指奇細之際又發款項不能破除情面量入爲出以致庫儲空虛均屬咎無可辭林肇元松長均著交部嚴加議處貴州候補道羅應廩素性誇詐承辦局務欺有虛糜委署貴州東道措施未能裕如致招物議貴州貴陽府知府汪元慶與本省巡撫胞弟聯姻跡近夤緣不知遠嫌候補知府曾彥銓勸辦捐輸據照在京因緣罔利江西南安府知府林祇亨係林肇元胞弟前與曾彥銓同辦捐務並不辭差迴避卽係同知蕭榮椿聲名平常

雖無招搖實據亦屬不能稱職羅應旆汪元慶曾彥銓林載亨蕭榮椿俱著交部分別議處○庚子諭朕  
奉 慈禧端佑康頤昭豫莊誠皇太后懿旨本日據左宗棠楊昌溶奏浙江設廠收養各路災民一摺據  
稱浙江爲南北水路通衢災民紛紛南下每日扶老攜幼不絕於途覽奏實深憫惻現經左宗棠等督飭  
委員分設賑廠妥籌收養加恩著撥給銀一萬兩俾資接濟因思本年順天直隸山東湖北安徽等省被  
災較重小民流析離居情形困苦深宮座念寢饋難安前經降旨截漕發帑並據該督撫府尹陳奏籌辦  
賑濟第災區甚廣人數衆多仍恐難以周徧自應特沛恩施順天直隸著撥給銀四萬兩山東著撥給銀  
四萬兩湖北著撥給銀三萬兩安徽著撥給銀二萬兩該部卽行迅速撥發該督撫府尹務當嚴飭所屬  
核實散放務使實惠及民用副軫念民艱至意○大祀 天於 闕丘道魁斌恭代行禮○辛丑戶部右  
侍郎敬信以病免○壬寅諭畢道達周家楣奏遵查阜康銀號文煜存欸一摺據稱查核該號票根簿內  
有撥號開列銀四十六萬兩第號上注明文宅字樣除前江西布政使文煜呈請究追阜康銀欸十萬兩  
稱山文煜代爲經手外其餘三十六萬兩簿中祇注文宅字樣等語著文煜明白回奏○以嵩申爲戶部  
右侍郎熙敬爲禮部右侍郎○諭御史劉恩溥奏候選道王海捐輸義學地租請飭杜弊以昭核實並請  
嗣後捐輸獎敘仍照舊例辦理等語著該部議奏○賞給貢書堂米百石○諭軍機大臣等現據李鴻章

會紀澤電報法兵已攻破越南山西省城劉團退走事機愈爲緊急山西既爲法踞則與我軍駐紮之地相接倘再得步進步滇粵邊疆俱形喫重此時惟有嚴飭各軍力保完署之地毋使再行深入岑毓英計已出省徐延旭業經出關著卽相機調度嚴密扼紮互相聯絡不得稍涉鬆懈劉團現在退至何處仍著設法激勵令其統營進紮關外各軍恐尙不敷防禦著張樹聲選派得力將領統帶勁旅馳赴鎮南關以資後路滇粵邊防著張樹聲岑毓英倪文蔚等妥籌布置扼要填紮徐延旭進至何處唐景崧是否亦在北甯一切詳細情形著張樹聲迅速電聞以慰廑系將此由六百里各密諭知之○癸卯諭昨據畢道達周家樹奏遵查阜康銀號文煜存款數目當諭令文煜明白回奏茲據奏稱該尙書山道員升至督撫履管稅務所得廉俸歷年積至三十六萬兩陸續交阜康號存放等語所奏尙無掩飾惟爲數較多著責令扣銀十萬兩卽由順天府向該號商按照定款如數退出以充公用○潘衍桐奏近奉 明諭申嚴門禁毋得視爲具文而內監蘇拉人等膽玩如故風聞太監中多有攜帶閒人出入禁闕迭經懲辦猶不知儆 愚以爲禍必杜其漸而機先起於微嘉慶十八年林清之變其已事也當 國家全盛之時尙有賄通內侍鄉導爲奸之事何況今日至各朝房蘇拉其衆其中冒名混充者諒所不免且難保無內通宦寺外結匪徒之弊竊思宮禁森嚴豈容宵小涸跡上年屢加整飭而未有專任其事之人所以懈弛仍前者實

由事極不一也應請 旨特派一二親信嚴明之王大臣專司門禁常川住宿勿令旁兼差使以肅警衛而專責成並會同內務府大臣步軍統領衙門前鋒統領護軍統領酌定章程或重申舊規或別著新令一以核實為主所有內監蘇拉等其形跡可疑者嚴為稽查倘有交接雜人任意出入情事立置典刑以儆效尤當此積弊難挽之時若非言出法隨雖再三告誡恐仍視為具文也臣又見禁門內外弁民其所佩持之刀械類皆頓折不堪一試夫兵可百年不用不可一日不備應 勅諭所司加意整頓或由外路選購或由各省製造新式利器運解備用以期緩急可恃否則有名無實 朝廷何責有此宿衛乎上諭國子監司業潘衍桐奏門禁緊要一摺據稱風聞內監中多有攜帶閒人出入禁閤各朝房蘇拉甚眾亦不免冒名混充請飭嚴申門禁等語禁城重地理宜嚴肅豈容閒人混跡著袁成總管內務府大臣前鋒統領護軍統領督飭官弁嚴密稽察如有太監蘇拉攜帶閒雜人等不遵禁令擅自出入者立即嚴拿懲辦毋得稍涉懈弛○乙巳諭吏部奏遵議處分一摺貴州巡撫林肇元署布政使糧儲道松長候補道羅應廉候補知府曾彥銓郎岱同知肅榮椿均著照部議即行革職貴陽府知府汪元慶江西南安府知府林載亨均著照部議降三級調用不准抵銷○以張凱嵩為貴州巡撫○諭禮部奏遵議刑部右侍郎彭庚身捐田贖族可否賞給匾額請旨辦理等語許庚身克承先志率族捐置義田二千餘畝義莊一

所奏瞻宗族古誼可風著南書房翰林恭書匾額一方賞給該侍郎祇領以示嘉獎○諭內閣學士周德潤奏各省委署藩臬運司官釐定限制道府州縣以下各缺當定畫一章程等語著吏部議奏○禮部奏內閣鈔出奉 上諭御史劉恩溥奏婦女請旌及陣亡殉難各員請卹請飭部妥議章程定限等語著該部議奏欽此欽遵到部查原奏內稱孝女烈婦以及陣亡殉難各員其情節有極可憫者一經入告無不立沛 恩施仰見 朝廷扶植綱常之至意惟是 國家政務重大於此者尙多鄉閭間之類此而不免 上聞者又復不少焉得一而牘列之近來京外各員請予 旌表各項者紛至沓來此等照例旌卹之事儘可統由禮部彙題以資觀感倘虞及書吏需索之煩年終守候之久更可嚴定期限不准任其挑駁請 飭下禮部妥議章程通行遵照其凡有奏事之員者若於前項見聞確京官則用本署印文咨交禮部科道則是山都察院堂官轉咨禮部外省督撫卽據實運咨禮部統以文到之後限三箇月彙題一次仍由禮部專派司員接檔詳查勿任延擱致滋弊竇內外各省公義私情可以兼盡而奇節至行亦得速爲表揚不至湮沒似不必屢以照例事件陳奏上 清聽等語查例開節孝貞烈婦女應旌表者由督撫學政會同具題取其冊結送部駁議等語又咸豐四年奉 上諭紳民殺賊遇害旣由各路統兵大臣及各督撫查明著於該州縣申詳到時卽行建坊入祠其婦女恐被玷辱拍軀明志者准

其從祀節孝祠等因欽此又同治元年議准旌表節婦如有實缺京官在部呈報者查係年例相符由部先行核准入年終彙題仍隨時行查各該省確切聲覆如有姓石外錯存歿互歧將原案撤銷出結具呈之員交部議處又同治五年奉 上諭都察院奏前署崇仁縣訓導蕭鶴齡之子文章蕭明瑞於同治二年春間病故伊妻劉氏吞金殉節所有職員呈請旌表並自行捐貲建坊之處著該部議奏嗣後各省赴該衙門呈請旌卹如有似此情節及割臂療疾等情卽著該衙門行知禮部照例分別准駁案具題欽此當經臣部奏准將該氏歸入年終彙題辦理其割臂療疾者仍歸入年終彙奏等因在案是旌表孝烈京官應取結呈請直省應核實具題定例纂詳允宜遵守今該御史以近來京外各員請旌卹者紛至沓來此等照例之事統由戶部彙題不必陳奏等因自係爲規復舊制起見惟所請京官用本署印文科道呈由都察院堂官咨照禮部外省督撫據稟運咨之處查實缺京官自七品以上如有同鄉親故應行旌表者原准其取結呈請則奇節至行無慮湮沒弗彰自毋庸另定新章轉滋紛擾至在籍呈請者除殉難外定例由督撫學政會同具題若概行改題爲咨亦與定例未協擬請嗣後實缺京官遇有奉親不嫁暨守節守貞等項仍照例取其同鄉京官印結赴部具呈其餘割臂療親及烈婦殉夫兩項並准具呈由都察院咨部核辦其在籍請旌者如係殉難男婦自應遵照咸豐年間 諭旨先行建坊入祠

隨時咨部存案至於貞孝節烈仍照例由督撫學政會同具題並造其事實冊結送部核議以符定制至所請山部三月彙題一次等因溯查臣部歷辦章程惟羞忿自盡隨案請旌之烈婦烈女隨時會同題請此外節婦貞女烈婦義夫孝子順孫均於年終分別彙題其孝子孝女割臂療疾例應請旨遵行者於年終彙奏所有各案到部後均隨時登記檔冊並經臣等督飭司員詳加稽核書吏無從需索其具呈之員原係在京供職並非因此守候是年終彙辦係屬定章歷久遵行並無貽誤若改為三月彙題一次毋論科鈔冊結一時到部不齊即在京具呈者照例應行查出給官員亦多未能隨時咨擬誠恐分次辦理輻輳滋多擬請嗣後隨案請旌之烈婦烈女仍隨時會同刑部具題外其餘烈婦孝女以及貞女節婦等仍照例歸入年終分別彙題彙奏以歸簡易而免煩瑣抑臣等更有請者建坊從祀乃朝廷風世勸俗之方若旌揚之典太寬轉覺堅卓之行不顯是以定例令取其實蹟冊送部核議以昭核實近來各省請旌往往孝子悌弟全無實在事蹟即婦貞女或無姓氏夫名並有不詳其朝代里居連行題請者雖經臣等逐一駁查而此種情節每年仍復不免擬請旨飭下各省督撫嗣後採訪貞孝節烈等項務核其姓氏里居實有事蹟可憑及年例已符者方准題請概不准僅憑稗官小說所記濫行列入庶坊表不涉虛誕而祀典益昭慎重至殉難各員請卹吏部查奏定章程內開凡文職陣亡人員由督撫奏請議卹

隨摺開具該故員銜名籍貫清單吏部按月彙奏一次等語。臣部歷經遵照奏定章程辦理在案。今據該御史奏稱陣亡殉難人員請卹咨部辦理並改三月彙題妥議章程等情。臣查陣亡殉難人員請卹事關獎職承膺例應專摺具奏若僅據咨辦理實不足以昭慎重至原奏所請改三月彙題一次查督撫奏請議卹之案如有行查銜名籍貫出身履歷應俟咨覆到部後按月稽核案簿彙奏一次歷經遵辦有年並無延擱若改爲三月彙題一次較之臣部向章限期轉覺延遲恐生弊端所請咨部議卹及三月彙題之處均毋庸議至武職人員請卹由兵部辦理兵部查陣亡殉難人員由統兵大臣暨內外臣工奏請議卹臣部將武職員弁照例議給卹銀世職文職人員照例議給卹銀均歸入彙奏辦理若原奏內於該故員生前所保官階未經詳晰聲敘行令查明報部或因人數過多原奏內聲明造冊咨部從前統歸彙題近年則改題爲奏向均按月具奏一次近來軍務底定各省請卹較減於前如一月之內到部案件不敷彙奏或二箇月或三箇月彙奏一次其改題爲奏亦然今據該御史奏稱陣亡殉難人員請卹咨部辦理並改三月彙題請飭妥議章程等語。臣等查陣亡殉難人員見危授命大節懷然自軍興以來經統兵大臣暨內外臣工將死事情形隨時奏明請卹無不仰蒙 俞允 朝廷勸忠之意至爲深遠若僅據咨辦理不足以示優異且事關卹銀世職亦殊失重帑項慎名器之道至臣部彙奏及改題爲奏酌量人數多寡



或按月具奏一次或二月三月具奏一次歷經辦理有年若統改三月彙題轉虞延擱該御史所請咨部議卹及三月彙題之處應毋庸議至陣亡殉難各員請卹查則例內開文武員官陣亡者先由吏兵二部議給廕卹得旨後移文過部奏請給與祭葬銀兩並行查籍貫事蹟造冊送交翰林院立傳分別入祀各昭忠祠等語又咸豐八年十一月二十三日具奏陣亡三品以下人員改請隨時繕單奏奉旨依議欽此歷經遵辦在案應毋庸另議章程得旨如所議行○諭軍機大臣等前經疊次諭令岑毓英統兵出關業據該督奏報派撥各營先期次第出省該督連日起程馳赴防所昨聞法兵攻破越南山西省城復諭令該督嚴密扼紮毋稍鬆懈現在事機緊急邊境安危關係甚重該督行抵何處著卽迅速前進將關外一切防務嚴密布置妥籌備禦並著體察越南現在情形應如何相機辦理之處迅速覆奏以慰廑系將此山六百里密諭知之○是月日本國使臣榎本武揚回國書記官吉田二郎署理

十二月丁未朔以易佩紳爲四川布政使奎斌爲山西布政使高崇基爲山西按察使○以國英爲浙江按察使李秉衡爲廣西按察使○諭張凱嵩現已簡放貴州巡撫著卽馳赴新任毋庸來京請訓○戊申上詣大高殿祈雪○左宗棠奏臣前接江蘇學政臣黃體芳緘稱江陰創建經書院名曰南菁仿詁經精舍之例專課通省經旨惟經費不敷落成有待請撥款接濟並請籌常年膏火之資等因臣以學

臣倡建書院係爲嘉惠士林起見用意深遠通省士子如願入院讀書就正經史之學概予收錄將來積學之士發名成業者必多茲體芳風貢文名勸學攻苦一時人望攸歸尤宜量爲扶助以慰士情臣此捐廉一千兩佐書院工料之費並札兩淮運司准北宗費項下提銀二萬兩解山學臣飭交江陰縣發商生息以爲每年膏火之資官爲經理年終結算申報學臣衙門仍移咨臣署備案以專責成而備稽考一面咨會凡有書局省分將局刻官備一部解發書院存儲俾學者得資緝閱下部知之○庚戌諭給事中孔憲毅奏參順天府尹周家楣徇私妄爲各款一摺著派額勒和布張之萬查明具奏○諭軍機大臣等現據各處電報法已攻陷山西將犯瓊州據以爲以圖案兵費等語瓊州備禦空虛著派彭玉麟迅速前往擇地駐紮卽飭所部各營與鄭紹忠一軍會合吳全美師船扼守瓊州所需餉項軍火著張樹聲隨時接濟毋任缺乏王孝祺卽毋庸赴關彭玉麟威望素著務當相機調度不必親赴瓊州以期慎重毋稍疏虞至各國商船照常貿易自應格外保護並著嚴飭水陸各營毋得別滋事端致生枝節○諭楊岳斌馳往福建會同何璟等籌辦海防並將起程日期迅速奏聞○辛亥 上詣 奉先殿行禮○頒給廣西馬平縣雷山廟匾額○希元奏本年九月間欽奉 寄諭飭令採辦上等參枝迅速解交內務府應用等因欽此遵卽飭派協領富爾丹交全等趕緊採辦業將所得參枝於九月十九日專差呈進並仍飭該協領

等留心採辦續有所得另行呈進在案現據協領富爾丹明陞等又探得大枝山參八苗中枝山參十二苗計重八兩四錢可精工用工價銀一千二百六十兩零二錢五分仍由所收參稅項下以錢易銀照數發給奴才謹將採辦參枝親加查驗分盛二匣嚴密包封飭交花翎防禦安升齊京呈進仍飭該協領等留心妥為採辦續有所得再當呈進報聞○癸丑吏部奏准管理八旗官學處咨稱本處議擬旗員入仕之初先行考試一片於光緒九年十月二十五日具奏奉 旨依議欽此鈔錄原片知照前來查原奏內稱檢查籌辦八旗學務處咨送全案內有侍郎錫原奏文職旗員概歸官學考試一節係為慎重仕途欲於旗員入仕之初有此一考則未仕者無不讀詩書之人即已仕者無不通文理之官所奏不為無見惟查文職旗員有由捐納出身者有由恩廕出身者有由議敘等項出身者其中並有例應捐免考試者入仕之途既殊則此次擬令考試非妥議章程不足以昭周密查文職官員事隸吏部所有該侍郎請將旗員入仕先行考試之處可否 飭下吏部妥議具奏以期詳慎等因 上諭翰林院檢討董文煥奏吏治廢弛請飭內外臣工俱為正途等語恭查同治五年三月十九日奉 上諭翰林院檢討董文煥奏吏治廢弛請飭內外臣工請求律例以資整頓一摺律例有關政治庶司自職平日均應加意講求精思熟習乃近來內外臣工於律例漫不經心以致劣幕奸胥得以把持朦蔽吏治廢弛率由於此著該部堂官於學習人員奏留時考

以本部則例條對詳明者方准奏留如不能諳習或咨回吏部或再留習三年由該堂官隨時斟酌其外省試用人員亦著各督撫於期滿時考以大清律例查其能否熟習分別繁簡補用其不曉律例文理荒謬者即著嚴加甄別無稍徇隱等因欽此又於光緒九年十一月十二日臣部奏定章程內開由俊秀監生捐納勞績兩項出身之府廳州縣及佐雜各員無論現任候補委用試用均一體考試其府廳州縣試論一道視其於刑名錢穀一切治理是否通曉更復而加詢問兼量其才其分別等第列為一等二等三等者現任照舊供職候補委用試用照常補缺醫事列為四等者現任開缺候補委用試用停補停委留省學習一二年後再行報考如願請咨回籍亦聽其便不列等者勒令回籍學習三五年後再行赴省報考至佐雜各員試以繕寫履歷者其能否字畫無訛及詢以字義是否尙能解釋並量其才具定為等第亦與府廳州縣一律辦理其新選得缺到省及在省候補各員有自揣未能考試者准其呈請該督撫予限學習惟於未經考試以前概不得赴任補缺委署其現任各員亦准酌量予限學習仍隨時調省考試以歸畫一等因均經通行辦理各在案茲據管理八旗官學大臣奏稱旗員入仕先行考試由臣部妥議以期詳慎自係爲甄覈人材慎重仕途起見惟查官學考課生徒是其本務八旗文職人員甚多如統歸八旗官學考試事涉煩瑣誠恐日久弊生有名無實等語查在京各官由該堂官考試在外各官由該督

撫考試章程已極周備毋庸再事紛更所有嗣後八旗文職除在外各官仍照舊章辦理外其捐納勞績  
初任分發在京各官並由部選授得缺人員於到署時一律由各該堂官認真考試以昭覈實如蒙 俞  
允 臣部行知京外各衙門一體遵照辦理得 旨如所議行○張之洞奏管省額解之物其大端有五曰  
鐵曰綢曰絹曰紙曰礪每年例解平鐵一批共八萬四百九十八斤好鐵四批共二十萬斤大礪綢一批  
共三十疋小礪綢一批共五十疋農桑絹一批共三百疋生絮絹四批共一千二百疋遇閏加四十疋呈  
文紙一批共四萬張毛頭紙一批共一萬張硫磺一批共十萬斤各項物價連腳例皆動支地丁然價腳  
之不敷者數倍例款有限各官攤捐不敷行戶幫貼騷然煩致官民苦之臣於上年六月具疏瀝陳管省  
苦累情形請免攤捐並請將平好鐵一項議給津貼均蒙 恩旨允准在案至綢紙三項前請折價解部  
經戶部工部內務府議覆仍令照舊造辦並准工部迭次催解硫磺前來查以上各宗物料在物產豐盈  
之時價廉之省倘以勞費無度以致累年均有積欠大祇以後官吏工商無不大困欠解思多自 臣抵省  
極力經營籌款項設專局選擇廉幹之員嚴剔弊端盡除冗費甘為怨府力任其難計自上年正月至本  
年十一月共籌解平鐵二批好鐵十六批大礪綢二批小礪綢二批農桑絹二批生絮絹八批呈文紙二  
批毛頭紙三批硫磺三批除 臣任內兩年所解已足兩年之數外並為補解鐵礪紙十批論管省之物力

實已竭盡無餘通計從前積欠截至光緒九年除戶部議免光緒三四五年平好鐵十五批外尚有未解平鐵一批好鐵四十四批大潞鐵四批小潞鐵四批農桑絹十一批生漆絹三十二批弓文紙六批毛頭紙十三批硫磺三批就此次欠數合而計之例價例腳之應動地丁者共需銀十萬六千六百餘兩幫價幫腳之應出攤捐者共需銀三十萬七千六百餘兩若必一一補解不惟攤捐已甚却費無從取辦即例應准動地丁之款爲數已逾十萬庫儲未免大傷伏思以一歲之款但使年額無虧自可不闕於用而各物又皆由庫款贖辦而來非如官民連欠錢糧多追一分於帑藏有一分之益今當度支匱乏之秋若耗損重金以求府庫充裕此勢勢不爲之需輓轡轉輸致此陳陳相因之物似爲非計況攤捐所有自來自府州縣以至佐雜無不有之查欠此攤捐者遠近二十年外大小五百餘員或已物故或已効參或已離省在督者十不存一凡欠解攤款於例不能參追即使追呼亦終無濟至於工少商疲行戶乏絕更不待言如此時而欲追集此三十萬之攤款竊恐難以劉晏之才商鞅之法亦必有所不能徒令官民愁嘆文弊滋亦非所以修吏治而存政體也

○審度時勢綜核盈虛惟有畫分新陳區別緩急查潞鐵爲典禮之用硫磺乃軍實所資無論督省如何竭蹶亦必新陳並辦擬自光緒十年爲始每年辦解本年大小潞鐵硫磺各一批並搭解欠各一批至鐵絹紙三項實既重滯數更浩繁費重則轉運艱難繁則工費大

正欵既鉅攤幫尤多今方仰沐 聖慈掃除積弊官民交慶喘息稍舒若此三項亦資以新陳並辦舊攤既不能追收新攤又不便料派如此鉅欵籌措何從且歷來部檄敦催責罰則遺新責新則遺舊以致貽此鉅累牽搭拖延永無廓清之日此等辦法原可掩飾一時但事理既有所不可做且愚拙之性亦有所不為不得不瀝誠呼籲量請裁免合無仰懇 天恩俯念督省凋敝之區公私交困准將同治三年分起至光緒八年分止欠解各批平鐵好鐵農桑絹生素絹呈文紙毛頭紙概予免解俾臣得以專力於額運年清年欵斷不至再有所虧即按年認解之滿緡硫磺新陳各一批亦可兼籌無誤庶幾庫儲既節額運亦清官累既舒民困亦減種種皆有裨益出自 逾格鴻慈下所可議奏○甲寅以徐致祥為內閣學士○以鳳秀尚賢為內閣學士○諭御史吳壽齡奏黃河修防亟應統籌全局變通盡利一摺著該部議奏○諭本年畿輔水災較重迭經頒發銀米賑濟貧民並賞給旗兵人等半月錢糧現在京城物價仍昂貴該兵丁等生計維艱殊深軫念所有八旗及綠步各營官兵暨食餉之閒散宗室覺羅人等並宗室覺羅孤寡著再加恩照現放章程賞給半月錢糧以示體恤○乙卯 上詣 大高殿祈雪○諭御史劉恩溥奏候選道王海捐輸義學地和請飭杜弊以昭核實並請嗣後捐輸獎敘仍照舊例辦理等語著該部議奏○諭鑲紅旗漢軍奏候選道王海建立義學並祖遺地畝呈請報効歸官一摺著該部歸入御史劉

恩溥所奏一併核議具奏○諭前駐藏幫辦大臣錫綬奏報八旗官學用款請將卓康商號存銀一萬兩飭追歸公一摺錫綬此奏殊屬取巧著將原摺擲還○丙辰英廉奏 惠陵新種儀行樹株經內務府及馬蘭鎮綠營各員弁督率樹夫等勦加培護數年以來一律繁茂青葱相應請予獎勵下部議奏○丁巳諭御史陳錦奏無論題選咨留保案請嚴定章程及司員保舉道員應開底缺各摺片著吏部議奏○諭御史陳錦奏武職保舉儘先班次請飭嚴定章程等語著兵部議奏○西安將軍奎鏜以病免○以吉和爲西安將軍紹祺爲察哈爾都統○戊午諭軍機大臣等北寧兵力尙單著彭玉麟與張樹聲籌商選派得力將領添募數營配足軍火迅赴前敵以資接應○已未前任戶部右侍郎溫葆深卒賜卹如例○庚申諭左宗棠代遞前任侍郎溫葆深遺摺輒爲請諡並敘及與該侍郎係屬師弟等語易名之典出自特恩前於同治十二年奉 旨不准臣下奏請左宗棠豈不知之乃竟率行具奏且措詞殊多不合著交部議處○諭給事中秦鍾簡奏吏部例章煩多請飭刪減歸併並飭各部院衙門一律照辦等語著該部議奏○諭前因駐藏幫辦大臣錫綬奏請將卓康商號存款飭追歸公殊屬取巧當將原摺擲還茲據給事中鄭溥元奏錫綬前在戶部與姚觀元董鶴翰啟績等表裏爲奸家稱巨富請派員查參等語錫綬久經告病開缺已往之事姑免深究惟該給事中稱其任意瀆奏實屬咎無可辭錫綬著交部嚴加議處至所



稱告病未經銷假人員應否呈遞奏摺之處著該部查明具奏○以烏拉布爲內閣學士○以馮爾昌爲內閣學士○壬戌諭都察院奏官紳閩族殉難援案懇准自行出資建祠一摺翰林院編修楊文濤之母高氏等吏部員外郎金保泰之父增生金嗣桂等均於咸豐年間在浙江省城殉難業經交部旌卹著准由楊文濤金保泰自行出資建祠以彰忠節○張之洞奏雲南報銷一案因部費浩穰以致官糾劾嚴旨按治計此案獲譴者內外大臣以及御史司員道府下至書吏凡三十餘人可謂近年大獄現經戶兵工等部釐定章程通行各省內外官吏宜皆儆懼奉法特是微臣區區之愚尙不能無過慮者蓋人之好利非訓戒所能移更之作奸非法令所能絕當此天威甫霽爰書猶新各部大臣亦皆有振作求治之意或可慚爲歛戢不旋踵而故智復萌矣緣錢糧事體最爲煩碎繳納或歛目不誤駁其法式或出入不外駁其日月或調查無干之案或飭造無用之冊苟欲吹索豈有窮期雖有精明之堂司亦難窮吏胥之伎倆迨至有意作難外省無從措手不予費則鉅款難銷予費則自干憲典將令外省何所適從且即予費而不浮不冒錢將安出筦度支者不亦難乎以上所聞從前歷辦軍需凡有報銷卽有部費特早年爲數較少且風氣樸樸職官自愛惟部吏有之司官以上則未聞焉咸豐季年始有司員招物議者同治中年始有局外之京官選人居間分潤者至近三五年而肆濫極矣以多年大利之源一旦欲盡絕之令

職官從此不據法網可也謂部吏從此不敢需索恐部臣亦未之敢信也臣愚以為馭胥吏之道與待士大夫異少恤其私然後可使無大潰吾法伏思各省奏銷錢糧事件皆有例定飯銀開支公項即以山西論之地丁奏銷有戶部飯銀一千七百五十兩零大湖兩府糧石奏銷有戶部飯銀一千二百兩均於耗羨項下動支文武鄉場奏銷有戶部飯銀六十兩於科場經費正項下動支河東鹽課奏銷有戶部山東司飯銀六百兩於鹽規雜課項下動支棚馬奏銷有兵部飯銀一百六十七兩不等於棚台項下動支前人立法具有深心故年例奏銷不致格外挑剔亦無格外使費當日所以於軍需報銷未經議及者國家治安二百餘年征伐用兵事非恆有當時一案軍務完竣經手人員祇了身事豈慮後來竊撥今日事勢以後海防邊備正宜經營防勇練軍不能驟罷豈得諱言兵事不為報銷籌一長策似不若明予體恤嚴定限制查山西蠲額歲徵地丁銀三百二萬餘兩奏銷飯銀一千七百五十兩零大較一千分之一今擬略準此數從優倍給定為千分之一每軍需善後報銷銀一萬兩解飯銀十兩約計此後各省銷案多者七八百萬少者一二百萬飯銀不過一二千金至數千金而止尙不至駭人觀聽俟本案核准後照准銷之數核計飯銀於一月內解部既便核計且免嫌疑其案歸何部核銷者卽解何部此項飯銀卽在軍需本案湘平升平項下動支豫湘平一項現經戶部奏明行令扣提報撥此案係外間節省盈餘向不報

部之款以充此用於庫款絕無所傷而有銷案卽有升平籌款不難名義亦順以理推之如部議允行各省督撫統兵大臣殆無不樂從如此辦理則部更有紙筆辦公之資無從藉口其於銷案准駁當可洗心斂手帖然一聽堂司各官之所爲倘再有藉端需索情弊經部臣言官暨外省督撫統兵大臣查出卽行奏明重治其罪庶幾各部正直之大臣賢能之曹司可以執守新章不虞竊擾秉公經理得行其志而各直省有督兵理餉之責者亦不至棘手而爲難內不索費則外無浮銷此亦理財節用之實際也下部議奏○癸亥張之洞奏本年四月戶部因言官條奏議以京員津貼令各省關提解外銷之款奏准咨行到晉當飭司道於藩鹽兩庫籌勦外銷公款於十月內全數解訖咨明戶部在案竊維京秩清約上軫 皇慈此體恤羣臣之 渥恩卽澄敘官方之本計至於籌津貼而不耗止款其見計臣苦心特是愚臣管窺尙宜詳議何也京朝賢士大夫每自矜重此項責以不報部之款便不能一一問所從來款目渾淪於受者不安一也取給外銷情同伙助勢必省省發書年年告糴婉言敦趣略法言情以春秋之主人而恃監河之分潤於政體有不肅二也所有巨款一旦呈解竭力措費有如發其私藏於外省籌解者有不願三也部臣原定二十六萬之數已屬竭力搜羅然散之羣僚所增無幾不能贖其身家豈能如部臣所言繩以峻法於砥節廉隅之本意有未盡四也不特此也既非庫帑難以考成創辦之始各省已未必踴躍爭

先濫假而逾期濫假而缺額五年以後必減其半少給則朝廷爲口實勢發則司農爲漏卮於筭度支者有不便五也議者或謂經支正款最爲正大堂皇不思財用方艱諸務省尙偏重一端殆難輕議臣竊本部臣維護正供之意更爲推闡而疏通之以爲欲使名正而理足莫如作正開支欲加支款而不傷庫儲莫如指撥各款歸入正款內銷指撥之款有三一曰釐金取之奏案一成一曰鹽務取之雜課一曰關稅取之溢解查各省釐金皆有奏定外提一成以備本省公用其出款雖云外銷其入款實爲內案不得與他項漫無稽考之外銷者並論若於此一成內酌提十分之二三合各省計已成巨款按其報收之數可知一成之數之所推其原動此項者或刪減或改支聽該省自爲籌畫此按一成之可指者也凡鹽務例設公項雜支比取給於雜課名目甚多各省鹽政不同大致要當不遠以河東論年額雜課二十七萬餘兩例提二萬六千八百餘兩以充鹽官養廉部飯解費及一切額設紙硃票銀酒筵衣廩花紅棚廠等雜費庶古士幫俸卽出其中大約亦居雜課之一成若於此項外用不入撥之款內亦提十分之二三而移其原動此款之暫緩者責令鹽道撙節另籌便可不勞而理此雜課之可指者也自去年飭下各關額外溢解當已陸續遵行夫謂市賣其溢解今又提其外銷稍嫌其重但此項本在例定正額盈餘之外正可移充此用似可定一溢解之數卽以爲津貼京員之數在司權者無大出入當可不致爲難此溢解

之可指者也通計各省關稅課鹽務釐金歲入三千餘萬核其一成應得三百餘萬釐一成中提其十分之三多則百萬少可九十萬十分之二亦可得六十萬即將此次之酌提定爲應解之常額惟釐額無准成數視其收數量分數批隨同京餉解部歸入正款核項有餘者留備推廣之用斯則 朝廷養士名正言順取之有名稽之有籍身受者不忤督催者不難此法一行經久不敝而於部 臣原議亦帑項正供之意適相符合且爲數多倍原派各員分給大可從豐假使每員以五百金牽算如部 臣所擬一千四百員之數亦止需七十萬金所餘尙多既無匱乏內顧之憂必有 國而忘家之報以國用歲出數十萬其視於虛伍之餉暫冗員之薪水有司之虧欠蠹吏之侵漁者不知凡幾若其 九重禁近之清班六曹政事之總匯苟可以激揚士風裨益治理雖多費帑金亦不覺惜況乎籌之在正供以外取之僅十分之三不過量節濫支撥除中飽豈有合九海關十四大省八驛運司道之全力而不能辦此者哉 臣身歷貧窮愧無理餉之策亦何樂建議以自困特以大局所關今幸沛此非常之 恩值此難逢之會不能不更爲之規美善而計久長在部 臣自不肯存竭澤之心在疆 臣宜深明無外之義各省大吏諒有同心下戶部議奏○張之洞奏戶部原擬京員津貼之數自數十兩至二百餘兩止爲數頗廉若以官品爲差則翰林院編檢等官所得定當有限卽科道賡有增益而最優之數亦復無多竊維翰詹之官乃 國家儲才之地

必使譽望濟重心力寬閒可以覃精稽古討論朝章講求經濟以備異日公卿之選且部曹尚有養廉飯銀印結費而翰詹無之若編檢居五品之班不得以既級論至於臺諫之職所司較煩費用較廣尤須峻其行檢養其風稜然後能正色糾繩無所瞻顧故翰詹職雖閒而用遠科道位不尊而責重惟此四項必宜加優計京官用度卽十分刻苦日須一金歲有三百金始能勉強自給中數以上員數不多計編檢約二百人科道八十人卽每員歲給三百六十金所增不過十萬戶部原派不敷儘可加提如卽此次摺內所需則更可加多可至五百金左右伏乞 敕部酌核從優定議至此四衙門加給之數無論定議時出之內銷出之外銷均屬易辦一聽部臣派撥三管雖貧願比大省但使 朝廷多得一賢才臺垣多抒一謫論其利亦已大矣得 旨覽○甲子諭本日禮部奏明年三月初十日 孝貞顯皇后三周年忌辰應否遣王公恭代行禮一摺敬念 孝貞顯皇后奉安禮成後朕尙未得恭詣 山陵春露秋霜不勝悲愴來年三月晦屆三周年之期方擬躬親展謁稍盡慕忱乃值本年畿輔水災極重小民困苦異常若再以踴路經行致煩供億閭閻實有難堪不得不酌經行權因時變通屆期著遣恭親王奕訢敬詣 曹祥峪定東陵恭代行禮並於初九日清明致祭行數土禮所有一切事宜著各該衙門敬謹預備○諭鑲紅旗滿洲奏和碩額駙品級人員應歸何處當差請旨遵行一摺醇親王和碩公主承繼子和碩額駙品級文

照著於明年開印後交待衛處帶領引見○丁卯 上諭 大高殿祈雪○左宗棠奏 臣欽奉 寄諭順天府府尹周家楣奏順天等省賑需亟須款項請飭令四岸舊商各商一律按票每引捐銀十兩以其半歸順天直隸以其半歸江蘇山東爲賑撫之需等語卽著酌度情形妥籌具奏等因欽此遵經札飭運司督商妥籌一面具片陳明候撥到核奏在案茲據兩淮鹽運使孫翼謀稟稱分咨四岸督銷局飭傳鄂湘西皖四岸運商妥爲勸諭以每引捐銀十兩計之共應捐銀五百餘萬商力實有未逮懇請擬奏前來臣據採勞諮其中窒礙約有四端請爲我 皇太后 皇上縷晰陳之兩淮引票試辦時原不名一錢自部章定而始有票價從前轉相授受所置亦屬無多自清水潭捐後而票價始增直隸災賑捐後而票價又增有票者居爲奇貨來淮者謂部章已定世業可圖或變易田產以集資或棄置酒茶而入局此壞彼奪票價遂增萬餘金在辦運之商多於此時入手岸局之更名易保其姓名月日皆有冊卷可稽今欲報捐票本盈蝕者已驟然長往方來者適重被其辜並有始則合夥繼則歸併名雖未更而票已易主礙難再輸票本一也說者謂該商等引票雖由價賣而資未歸公似亦近理不知創行票法係出示招徠彼時未案各商以萬金之價當事者亦未逆料今日之可抵萬金也上無禁令交相爲市者遂自爲增減溯歟由來無一非購自重價謂 朝廷未收萬餘金之捐該商等固無異議謂准商未出萬餘金之價該商

等實且苦衷礙難再輸票本二也舊票歷年捐賑報効在鄂湘等案統計原祇三千餘金非以兩岸實有出過四千餘金及五千餘金者不等在前卽有參差亦無非因時因地各制其宜譬之田例止升科而墾熟以後或一年而易其主或數年而易其主亦屬民間常事如此官田得值遂捐價買熟田之戶爲無價之田復令再輸官價尤昂於新票而去歲所增仍皆歸併舊商承運是增引雖有先後之別而承運實無新舊之分礙難再輸票本三也商賈之道以成本輕重爲盈虛刻下該商等之票本已極重稍失營謀卽有虞虧折倘更加捐票本則前之銖積寸累者一轉瞬皆化爲烟雲爲謀衣食轉累身家無論鉅款莫可籌維卽欲賣票償捐恐他人亦聞風裹足是多取其利本在而利尙可生重去其本本去而利益見絀礙難再輸票本四也以上各節委係實在情形竊念兩淮二十年來課釐兩項報部者將及八千萬兩他如各項商捐並前年戶部籌餉捐輸入奏者又三百餘萬兩近因各處錢店倒閉銀路艱緊該商等方請借給公項以資周轉若令再捐鉅款商力實有不支不得不據實瀝陳仰求 聖慈垂察下戶部知之○左宗棠奏洪湖每遇盛漲水勢直趨南運河淮揚數州縣城邑田廬刻有其魚之懼擬擇揚黃河淤墊之處開掘中泓引淮水入雲梯關循獨行人海之舊經 聖明欽奉 諭旨於民生大有關繫等因臣比飭署淮揚海道徐文達徐州道程國熙會勘稟覆前來臣定於明正初旬卽帶得力營哨各員弁及熟



請水利人員親臨履勘大加興挑臣所部在甘肅新開直隸治水頗著成效竊思操刀不割是謂失時故擬交卸後仍留三數月力肩此舉庶幾保此億萬生靈仰副 朝廷仁育黔首之至意惟工段綿長需費甚鉅前督臣於導淮案內奏撥五河正陽兩卡二成鹽釐隨撥隨支並無存欸而前項大工斷非二成鹽釐所能敷用查淮北課釐向分十成攤解以五成解金陵四成解安徽一成解清江當時各處均有軍務是以按成分撥藉充軍餉目前清江安徽軍務早竣近來賑務籌撥米銀不遺餘力向本無分畛域值此復准大工關繫數省安危需用欸項孔殷不得不妥籌有著之項擬將所收課釐自光緒十年正月起暫免分攤全數提充復淮工用如安徽清江另有要工需用欸項臣仍當隨時酌量分撥以免顧此失彼下部知之○左宗棠奏湖北之安陸襄陽鄖陽荊州宜昌五府及荊門暨湖南之澧州同治十一年川淮分界摺內議明仍由淮商就中設店撥售迭經鄂省及戶部奏咨催辦而淮鹽迄未運往者一以川鹽遍地皆是淮鹽幾無可立足一以鄂餉尚未經議明淮商總不免觀望現在鄂湘兩岸奏加新崇三萬引換輪甚滯亟須開拓銷路而川鹽一時尙難驟禁飭據鄂湘督銷局具稟責成額內各商揀選色白味佳之鹽與川鹽試辦分銷於沙市樊城爲總匯先從岳州螺山立子店逐漸進步准擬定章每引收課釐銀六兩四錢八分以後五府二州照章核收全貼鄂餉除扣川鹽加稅項下應行解淮每斤二文半比較鄂省所

收川稅不相上下。卽無虞。短絀經。臣等商湖廣督。臣卡寶第接其覆文。允先試辦。此事早經部准。已飭湖南北督銷局趕緊督商運鹽試銷。仍咨明川省俟川省復到再行會奏。下戶部知之。○戊辰諭兵部奏已故總兵陳國瑞可否徵還世職一摺。陳國瑞前已加恩開復原官。著徵還雲騎尉世職。○以張端卿爲安徽按察使。○己巳以慶俗爲盛京將軍。○以成孚爲河東河道總督。孫鳳翔爲河南布政使。○頒給湖北荆州江神廟沮漳二神祠匾額。○諭軍機大臣等。徐卨奏請陳導淮辦法。以弭江皖水災。綸。國呈覽。一摺。據稱江皖兩省水患頻仍。亟須挑濶沂爲導淮先路。仿照從前抽溝之法。循序疏治。由大通口引河入海。洩水較易等語。著左宗棠楊昌濬照所奏各節。悉心會商妥籌辦理。○諭軍機大臣等。徐延旭奏法人攻踞越南山西省城。現在嚴防北甯。請飭廣東等省合圖抽勘各摺。片。越南山西失守。彼族勢甚披猖。北甯防務益形喫緊。現據岑毓英奏報。已率所部二十營起程。十二月內可以齊抵防所。著該督妥籌調度。實力扼防。激勵劉永福一軍。速行整頓。並著督飭各營與粵軍聯絡聲勢。援應北甯。該督撫等總當合謀併力。保守宗蕃之區。以固邊境。是爲至要。將此由六百里各密諭知之。○庚午諭前據給事中孔憲毅奏參順天府府尹周家樹徇私妄爲各款。當派額勒和布張之萬查明具奏。茲據奏稱詳查明確。不難局資善堂立章俱極妥協。並無辦理不善之處。通州糧店一案。該府尹批呈各詞亦甚平允。卽著毋庸置議。惟

查封阜康銀號將數年前寄存書箱攜回致啟浮言前戶部員外郎賈孝彤照料平糶局雖係襄理營事惟該員尙在服中該府再三勸令從事賈孝彤未能固卻均有不合順天府尹周家樹前戶部員外郎賈孝彤著交部分別議處順天府糧馬通判周之辰雖訊無辜鄧寶據惟係出身市廛著革職永遠隨時查看如果不能勝任卽行據實參奏○諭兵部奏遵旨嚴釐處分並告病人員應否遞摺查無明文一摺前駐藏幫辦大臣錫麟著照部議降四級調用不准抵銷並折罰所兼世職半俸九年免其降調世職至告病人員雖據查無不准明文惟究於體制未合嗣後凡告病未經銷假者概不准自行遞摺奏事○辛未戶部奏內閣鈔出光緒九年十一月二十四日山西巡撫張之洞奏督省年例應解物料欠鉅累深擬請將銅礦兩宗新陳並解鐵絹紙三宗免陳解新以節庫帑而恤官民一摺奉 旨該衙門議奏欽此○等伏查督省採辦鐵絹紙三項乃年例解部之款該撫近因積欠過鉅請免陳解新自係爲撙節庫帑體恤官民起見然樹欠之能否免解應以庫存物料之盈絀爲斷除該省應解工部潞緇硫磺業經該撫奏明新陳並解應由工部查明辦理外查工部庫存呈文紙將次放竣農桑生素絹所存無幾若該省僅將年額解足各處領取實屬不敷開放且呈文紙農桑生素絹例價無多卽新陳並解需款尙不甚鉅應令該撫將舊欠呈文紙按年搭解積欠農桑生素絹按年酌量分成搭解以濟要需至平好鐵毛頭紙現在庫

存雖不其多如該省嗣後果能按年照額解清無欠尙可年敷一年之用但此宗物料存儲以備不時之需可使有餘不可使之不足今據奏請將同治三年起至光緒八年止欠解各批平好鐵毛頭紙農桑生紫絹概予免解查該省於歷年價腳各銀已爲文領奏銷未便議准惟查該省大抵以後庫藏空虛官民交困所有舊欠之平好鐵毛頭紙若必議令刻期補解則例支價腳不敷採辦取之攤捐而攤捐已裁未便再行滋擾臣等悉心商酌除前經議免光緒三四五等年平好鐵十五批外擬請將該省欠解平鐵一批好鐵四十四批毛頭紙十三批一律准其緩解俟督省元氣大復物產豐盈之時再由該撫查看情形據實奏明設法補解庶官民不致受累庫儲亦可借以稍紓至嗣後年額應解之款請 旨敕下山西巡撫自光緒十年起按年解足不准帶欠致誤要需得 旨如所議行○壬申彭玉麟奏法夷吞噬越南占踞西貢已二十年現復由河內奪占宣泰山西北圻勢頗危急其逼迫越人立約欲中國不預紅河南界之地及許在雲南蒙自縣通商顯係圖我滇疆冀專五金之利不特滇粵邊境不能解嚴卽廣東天津亦未知撤防何日彼以虛聲我以實應數年之後疲於奔命必至財力俱窮臣早夜思維寢不安席疊奉寄諭飭各軍堅守北圻以固滇粵門戶然自唐炯無故退兵劉永福大受其累旋至山西不守前奉 寄諭飭總理衙門照會各國告以法如侵及我軍駐紮之地卽不能坐視等語然昨據廣西撫臣徐延旭來

兩前月十七日法夷攻犯山西正官軍紮地也旗號滿布竟敢直前進攻是在彼族業已明目張膽無所顧惜刻下滇粵官軍分途進取皆是正面文章必須用間出奇別開生面以假敗伐賊之謀爲圍魏救趙之舉大局庶有轉機歸端生贅腹後下針此之謂也據臣軍營務處候補道王之春密稟現有三品銜候選道鄭官應廣東香山人自幼從海船徧歷越南暹羅新嘉坡等處熟悉洋務現辦上海招商局及繼布機器局南北電報局與王之春共事有年每談及法會蹴越等衅廣東同深義憤據云暹羅國王鄭姓廣東人曾徵中國用漢人爲官屬現有掌兵政者六人如中國之總督皆粵人也其人夙重鄭誼與鄭官應熟識談及法越之事亦爲不平且引爲伊國切膚之患伊國與越之西貢毗連嘗欲出其不意攻其不備由暹羅潛師以襲西貢先襲法會之老巢又暹羅極東邊境爲英國所闢者曰新嘉坡地極富庶粵人居此者十餘萬中國設有招商分局即西貢現亦有招商分局均係鄭官應所司擬懸重賞密約兩處壯士俟暹國兵到時舉火內應先奪其兵船焚其軍火以期聚殲此一端似有把握惟未奉 勅旨未敢舉動私相歛息而已今韓奉 諭旨明示決裂與法夷決戰鄭官應恰有信來求爲奏調回粵親赴暹羅西貢新嘉坡等處密約布置機有可乘等語臣查越南所都曰富春而以廣南嘉定爲西京即西貢也距富春千餘里法會圖越以此地爲根本境接暹羅過考圖志雍正乾隆兩朝先後 賜御書匾額於暹羅

曰天南樂國曰炎服屏藩乾隆三十六年暹羅爲緬甸所滅遣臣鄭昭粵人也復土報仇衆推爲主昭卒子華嗣五十一年 錫封暹羅國王十年一貢其人止尊中國而不知有他國用漢人爲官屬理國事掌財賦皆粵人爲多與鄭官應之言皆相照合則其言可信矣又考明萬曆甲午秀吉破朝鮮時暹羅自請出兵掃日本以牽其後演撫陳用賓約暹羅夾攻緬甸緬賊於奔命遂不復內犯永歷困於緬暹羅復起兵攻緬以援平定國之師其忠於明若是乾隆甲緬甸不臣得暹羅夾攻而緬始納貢阮光平黎景氏養海盜寇重洋及暹羅助阮福映滅新阮俘獻海盜而南洋始肅清其忠於 本朝又若是然則暹羅之能助順可信矣今越南事急滇兵未到劉永福獨力難支北圻近分喫緊 擬密飭鄭官應潛往各該處妥爲結約告以封豕長蛇之患輔車唇齒之依該國又夙稱忠順鄉誼素敦倘另出奇軍內應外合西貢必可濟師而得惟是冒易行難其中有無窒礙先令密速探明俟有端倪 擬再派王之春改裝易服同往密籌屆期密催在越各軍同時並舉而不明言其故西貢失則河內海防無根法人皆可驅除越南或可保耳昔陳湯用西域以破康居王元策用吐番以掃印度皆決機微外不由中制用能建非常之功我國家厚澤深仁自應有此得道之助惟此舉若成則西貢六府自應歸併暹羅庶能取亦復能守蓋西貢爲越之南圻係嘉慶初阮福映兼并占城及真臘北境非安南故土志稱安南南北三千七百里東西一

千五百里外指北圻言也阮氏有西貢而不能守被法人奪占二十餘年暹羅能得之阮氏豈能復問  
傾覆栽培在 聖朝亦因材而薦而已臣現附片奏調鄭官應伏乞 飭用電報傳知以免南北洋大臣  
奏留致稽時日除俟辦有端倪再行密報並預籌越南善後事宜屆時密奏外所有附結外援乘虛與搆  
西貢各緣由理合先行密陳伏乞 皇太后 皇上聖鑒再此舉惟 聖與王之眷鄭官應等數人知之其  
餘軍中將領粵中督撫概未與聞以昭慎重合併聲明 上諭軍機大臣等彭玉麟密奏附結暹羅與取  
西貢一摺其見籌畫苦心未始非出奇制勝之策然兵家用間貴有所因暹羅國勢本弱自新嘉坡滿加  
刺等處爲英所據受其挾制朝貢不通豈能更出偏師自挑強敵道員鄭官應雖與其國君臣有鄉人之  
誼恐難以口舌遊說趣令興師且西貢新嘉坡皆貿易之場商賈者流必無同志懸賞募勇請款尤鉅亦  
慮接濟難籌法人於西貢經營二十餘年根柢甚固中國無堅輪巨礮故未能渡海出師掃其巢穴即使  
暹羅出力而無援兵以繼其後法人回救勢必不支況英法迹雖相忌實則相資彼見暹羅助我用兵則  
猜刻之心益萌併吞之計益急恐西貢未能集事而湄南先已慮亡以上各節皆宜層層慮及閱該尚書  
所奏多採近人魏源成說移其所以制英者轉而圖法兵事百變未可徇臆度之空談敢無窮之過數億  
機事不密先傳播於新聞紙中爲害尤鉅該尚書原奏所稱言易行難者諒亦見及於此除鄭官應一員

業經由臣等諭南北洋大臣准其調粵差遣外著將所指各節迅速覆奏○諭前據御史恩隆奏土默特旗家奴德木卻扎布糾黨將伊家主索德那木葉錫搶劫當降旨令刑部會同理藩院訊辦嗣據該御史奏理藩院司員達冲阿玉春等於會訊之外私提扎隆阿追索資財等情復諭令確查具奏茲據刑部奏稱原參德木卻扎布等搶掠擄訊抗拒各節並無其事惟德木卻扎布在旗擅權不爲無因非德木卻扎布等到案難期水落石出等語著理藩院嚴傳德木卻扎布恩合巴雅爾歸案另行派員會同刑部審訊務得確情妥擬具奏達冲阿玉春等有煙前項情事著理藩院即遵前旨確切查明具奏○甲戌 上詣

太廟行禮○是年統計出口貨直銀七千九萬七千六百九十三兩進口貨直銀七千三百五十六萬七千七百二兩相抵虧三百三十七萬九兩凡徵貨稅銀一千三百二十八萬六千七百五十七兩